


妙法蓮華經指掌疏

卷六

BQ
2057
T85
1749a
v. 11



法華指掌疏卷第六

自是後學通理述

嗣法門人所元錄

京西潭松山峭雲寺蓋院比丘來琳整列

一別明五種功德

品題

妙法蓮華經隨喜功德品第十八

隨聞隨順不生變退之心喜謂歡喜不生退心

念無變壞故不生退法之慈無退道故自成覺

老後以因歡喜功德無窮在法可現若論此經

有五種功德今拾後從前金方經為名之在經

前二經後三經由經為二前是變地隨轉前無

法華指掌疏卷第六

賢宗後學通理述

嗣法門人明元較字

京西潭柘山岫雲寺監院比丘來琳督刊

二別明五種功德

品題云

妙法蓮華經隨喜功德品第十八

隨謂隨順。不生違逆之心。喜謂歡喜。不生怨嫉之念。無怨嫉故。不起謗法之愆。無違逆故。自成繫珠之緣。以因驗果。功德無窮。在文可見。若論此品。具有五種功德。今捨後從前。惟以隨喜名之。若別明者。一謂隨喜功德。偈云。如是展轉聞。其福尚無量。

何況於法會。初聞隨喜者是也。二謂暫聽功德。偈云。須臾聞歡喜。今當說其福。後生天人中。得妙象馬車等是也。三謂暫勸功德。偈云。若於講法處。勸人坐聽經。是福因緣得。釋梵轉輪座是也。四謂誠勸功德。偈云。若有勸一人。將引聽法華。言此經深妙。千萬劫難遇。乃至今當說其福。世世無口患等是也。五謂誠聽功德。偈云。何況一心聽。解說其義趣。如說而修行。其福不可限是也。總言此經。似善見藥。如甘露漿。觸之而有病皆除。沾之乃無死。不生。前品論之不盡。復於此品而進論之。

經文分二

一彌勒獨問隨喜二如來具明五德

初獨問隨喜

爾時彌勒菩薩摩訶薩。白佛言。世尊。若有善男子善女人。聞是法華經。隨喜者。得幾所福。而說偈言。世尊滅度後。其有聞是經。若能隨喜者。爲得幾所福。

詳彌勒問意。蓋自前品發來。由前云如來滅後若

聞是經。而不毀訾。起隨喜心。當知已爲深信解相。

彌勒意謂。隨喜功德。似乎得福無多。佛竟許其爲

深信解相。恐難取信。故躡此有得幾所福之問也。

二如來具明五德

既明隨喜功德。恐不及再問餘四。故具明之。亦如來爲法求人。

不避饒舌意也。

二 一長行二偈頌 初五 一隨喜功

德二暫聽功德三暫勸功德四誠勸功德五誠聽

功德

初四

一一人隨喜轉教二展轉以至五

十三較量最後功德四况顯最初隨喜 初

爾時佛告彌勒菩薩摩訶薩。阿逸多。如來滅後。若比丘。比丘尼。優婆塞。優婆夷。及餘智者。若長若幼。聞是經。隨喜已。從法會出。至於餘處。若在僧坊。及空閑地。若城邑巷陌。聚落田里。如其所聞。爲父母宗親善友。知識隨力演說。

四衆旣入佛法。俱屬內教。餘智總統百氏。俱屬外

教。此言隨喜之人。無論內外也。長該二十以上。幼該二十以下。此言隨喜之人。無論大小也。聞經隨喜者。謂信而隨順。解而歡喜。出至餘處者。謂欲以所得轉教於人也。僧坊空閑者。寂靜之地。城邑巷陌等。雜亂之區。此言轉教之地。無論靜亂也。如其所聞者。謂照自所得。無妄增減。父母宗親者。近攝同族。善友知識者。遠該異姓。此言轉教之機。無論親疎也。隨力者。隨其智慧之力。演說者。演其所聞之法。然亦無論其智之勝劣。說之全缺。但就其不私於己。樂善與人。其心志已自可嘉。其功德已自

無限。二展轉以至五十

是諸人等聞已隨喜。復行轉教。餘人聞已。亦隨喜轉教。如是展轉至第五十。

字經三書。豕亥變體。今既展轉傳聞。至第五十。較之初於法會耳提面命者。不啻霄壤之異矣。

三較量最後功德三 一設事爲例二問答功德
三正與較量 初二 一財施徧給二法施普利
初

阿逸多。其第五十善男子。善女人。隨喜功德。我今說之。汝當善聽。○若四百萬億阿僧祇世界。六趣四生

衆生。卵生。胎生。濕生。化生。若有形。無形。有想。無想。非有想。非無想。無足。二足。四足。多足。如是等在衆生數者。有人求福。隨其所欲娛樂之具。皆給與之。一一衆生。與滿閻浮提金銀琉璃。硨磲碼碯。珊瑚琥珀。諸妙珍寶。及象馬車乘。七寶所成宮殿樓閣等。

初許說誠聽。欲以第五十人較量最初功德。故誠以善聽言知此。卽知彼也。○若四下舉衆明施。僧祇。卽名無數。况又積至四百萬億。極言其衆之廣也。衆生趣向有六。受生惟四。故云六趣四生。胎卵濕化。釋四生。該六趣也。楞嚴云。卵惟想生。胎因情

有。濕以合感。化以離應。然此等似局有形。故向下復以有形無形等而對論之。有形。欲色界也。無形。空無邊處也。有想。識無邊處也。無想。無所有處也。非有想。非無想。非非想處也。然此等似局勝報。故向下復以無足二足等而對論之。無足者。蠕動之類。二足四足等。可知。如是等者。指上已說等餘未說。總爲微細俱該。故統言在衆生數者。有人指能施之人。求福求殊勝之福。殊勝之福。須憑殊勝之施。故隨其所欲。可娛可樂之具。皆給與之。一一衆生。與滿閻浮金銀等者。爲令娛樂之具。無所乏也。

閻浮提。卽南瞻部洲。以須彌南面有樹名閻浮洲。
依樹名。一法施普利。

是大施主。如是布施滿八十年已。而作是念。我已施
衆生娛樂之具。隨意所欲。然此衆生皆已衰老。年過
八十。髮白面皺。將死不久。我當以佛法而訓導之。卽
集此衆生。宣布法化。示教利喜。一時皆得須陀洹道。
斯陀含道。阿那含道。阿羅漢道。盡諸有漏。於深禪定。
皆得自在。具八解脫。

雖行財施。心猶未足。故於八十年已。而作是念。娛
樂之具。但濟生前。將死不久。後世何資。故當以佛

法訓導。示教利喜者。示以出世利益。教以聞法歡喜也。聞法歡喜。漏盡心開。故一時頓超四果。須陀洹。此云入流。謂初斷三界見惑。入聖流故。斯陀含。此云一來。謂已斷欲界前六品思惑。一來欲界後三卽斷故。阿那含。此云不來。謂已斷欲界思盡。轉生上界。不來欲界故。阿羅漢。此云不生。謂見思俱盡。永不受後有之生故。盡諸有漏。卽見思俱盡義也。九次第定。漸轉漸深。無障無礙。故云於深禪定。皆得自在。八解脫義。釋見方便品中。設事爲例竟。

二問答功德

於汝意云何。是大施主。所得功德。寧爲多不。彌勒白。佛言。世尊。是人功德甚多。無量無邊。若是施主。但施衆生一切樂具。功德無量。何況令得阿羅漢果。

博施濟衆。聖人猶病。是大施主。能以如許之財。供若干之衆。且又訓以佛法。令證四果。其功德自應無有邊量。故如來故意垂問。寧爲多不。而彌勒直以甚多無量無邊答之。若是施主等。轉釋上義。言但施樂具。已稱無量。況令證果。故應復無邊也。

三正與較量

佛告彌勒。我今分明語汝。是人以一切樂具。施於四

百萬億阿僧祇世界六趣衆生。又令得阿羅漢果。所得功德。不如是第五十人聞法華經一偈。隨喜功德。百分千分。百千萬億分。不及其一。乃至算數譬喻所不能知。

示以分明者。顯是真實語故。樂具之施。固屬有漏。令得羅漢。仍滯權宗。第五十人。雖曰展轉傳聞。一偈隨喜。堪爲成佛因種。故雖二施功德。百分千分。等不及此之一分。是知此之功德。乃至算譬所不知也。然此義極難體信。今助一喻。以發明之。彼財施功德。如鉛。權乘功德。如汞。隨喜功德。如少分之

金第五十人展轉傳聞。如金已入假。要知金雖入假。而愈煉愈精。鉛汞非金。而愈煉愈假。故雖多分鉛汞。不如少分入假之金。知此喻者。自不疑較量之旨矣。較量最後功德竟。

四況顯最初隨喜

阿逸多。如是第五十人。展轉聞法華經。隨喜功德。尚無量無邊。阿僧祇。何況最初於會中。聞而隨喜者。其福復勝。無量無邊。阿僧祇。不可得比。

展轉傳聞。不無譌謬。其隨喜功德。尚有無量無邊。阿僧祇之多。何況最初耳提面命。聞而隨喜者。其

福德自然復勝。彼無量無邊阿僧祇者。不可得而比也。隨喜功德竟。二暫聽功德。

又阿逸多。若人爲是經故。往詣僧坊。若坐若立。須臾聽受。緣是功德。轉身所生。得好上妙象馬車乘珍寶輦輿。及乘天宮。

爲是經故。往詣僧坊者。顯往意之誠。若坐若立。須臾聽受者。顯聽時之少。由此納種爲因。再來一聞便悟。道重人尊。人天所敬。故能得好上妙象馬車乘。乃至及乘天宮。三暫勸功德。

若復有人。於講法處坐。更有人來。勸令坐聽。若分座。

令坐。是人功德。轉身得帝釋坐處。若梵王坐處。若轉輪聖王所坐之處。

人來方勸者。顯是暫時起見。分座令坐者。寓有兼利之心。如是之人。當來必爲法師。旣爲法師。若遇帝梵輪王求法。則皆可得其坐處。如今延請法師。必虛座以待。卽其證也。四誠勸功德。

阿逸多。若復有人。語餘人言。有經名法華。可共往聽。卽受其教。乃至須臾間聞。是人功德。轉身得與陀羅尼菩薩共生一處。利根智慧。百千萬世。終不瘖瘂。口氣不臭。舌常無病。口亦無病。齒不垢黑。不黃不疎。亦

不缺落。不差。不曲。脣不下垂。亦不褻縮。不麤澀。不瘡
胗。亦不缺壞。亦不𠵿斜。不厚不大。亦不鰲黑。無諸可
惡。鼻不匾。亦不曲戾。面色不黑。亦不狹長。亦不窳
曲。無有一切不可喜相。脣舌牙齒悉皆嚴好。鼻修高
直。面貌圓滿。眉高而長。額廣平正。人相具足。世所
生。見佛聞法。信受教誨。

指經教往者。顯是誠意勸聽。彼人感其誠故。相從
入會。故云卽受其教。須臾間聞者。如前若坐若立。
暫時聽受。暫時聽受功德。尚如前說。况復能勸之
人。豈無勝報。故向下特約是人功德而詳明之。準

大成引十地論說。陀羅尼菩薩居五地。愚謂陀羅尼。此云總持。旣云總持。則一攝一切。但指圓教。勿滯位次。蓋以此經屬圓。勸聞者自應與圓人相依。共生一處。卽相依義也。相依故。熏陶漸染。故得利根智慧。利根智慧故。具法師德。獲法師相。故得百千萬世。終不瘖瘡等報。瘖瘡者。音不清。聲無字也。口無惡味。故云不臭。舌不短結。故云無病。口亦無病者。無瘡患故。齒不黑黃者。潔而白也。又不疎缺者。密而周也。復不差曲者。齊而端也。下脣收整。故曰不下垂。上脣包密。故曰不褰縮。褰翻脣。縮短脣。

也。赤細而潤。故曰不麤澀。瘍患不生。故曰不瘡。眦。眦謂脣生瘍也。缺壞者。脣不周美。眦斜者。脣不端正。脣厚而大者。必蠢。脣黧而黑者。必賤。此等不形。不致憎嫌。故云無諸可惡。匾匾。鼻塌陷也。曲戾。鼻不正也。心正容舒。故面色不黑。顴骨高大曰不狹長。顴肉隆圓曰不窳曲。此等皆離。能招愛敬。故云無不可喜。此上明離過相也。脣舌牙齒。不惟離上諸過。而且端嚴美好。鼻修高直者。不惟離於匾匾。及於曲戾。而且修長隆正。面貌圓滿者。不惟離於狹長。及於窳曲。而且圓滿豐厚。眉高而長者。必主

文貴。額廣平正者。定有尊榮。賦形如此。足稱完美。故云人相具足。此上明具德相也。既具法師之德。又獲法師之相。佛法益親益近。根智轉利轉明。故。世世見佛聞法。信受教誨。誠勸功德竟。

五誠聽功德

阿逸多。汝且觀是勸於一人。令往聽法。功德如此。○何況一心聽說讀誦。而於大衆爲人分別。如說修行。初命觀前德。○何況下。况顯誠聽一心者。聽之誠也。由聽之誠。故能讀說修行。彼勸聽之德。自不可與此同日語也。長行竟。

二偈頌

標頌云

爾時世尊欲重宣此義而說偈言。

正頌分五

一頌隨喜功德二頌誠勸功德三頌暫聽功德四

頌暫勸功德五頌誠聽功德

初四

一頌一人

隨喜轉教二頌展轉以至五十三頌較量最後功

德四頌况顯最初隨喜

初

若人於法會得聞是經典乃至於一偈隨喜爲他說。

二頌展轉以至五十

如是展轉教至於第五十

三頌較量最後功德

準長行分三。今缺問答功德。餘亦從畧。不曲分。

最後人獲福。今當分別之。如有大施主。供給無量衆。具滿八十歲。隨意之所欲。見彼衰老相。髮白而面皺。齒疎形枯竭。念其死不久。我今應當教。令得於道果。卽爲方便說。涅槃真實法。世皆不牢固。如水沫泡燄。汝等咸應當。疾生厭離心。諸人聞是法。皆得阿羅漢。具足六神通。三明八解脫。○最後第五十。聞一偈隨喜。是人福勝彼。不可爲譬喻。

初頌設事爲例。

義頌

最後等六句。頌財施徧給。可知。

見彼等十六句。頌法施普利。說涅槃真實者。令慕滅而修道故。說世皆不牢者。令知苦而斷集故。水

沫忽聚忽散。水泡忽起忽滅。陽燄忽有忽無。世相不牢。亦復如是。故教以生厭離心也。○最後下頌正與較量。畧不可爲譬者。謂彼福不能譬此。長行云不及其一是也。

四頌况顯最初隨喜畧

如是展轉聞。其福尚無量。何況於法會。初聞隨喜者。

頌隨喜功德竟。二頌誠勸功德超

若有勸一人。將引聽法華。言此經深妙。千萬劫難遇。卽受教往聽。乃至須臾聞。斯人之福報。今當分別說。世世無口患。齒不疎黃黑。脣不厚褰缺。無有可惡相。

舌不乾黑短。鼻高修且直。額廣而平正。面目悉端嚴。
爲人所喜見。口氣無臭穢。優鉢華之香。常從其口出。
大成云。昔育王請僧入宮供養。有比丘名優鉢羅。
口出優鉢華香。王疑比丘年少。口中含香。勅令以
水漱之。漱已倍香。王曰。含香久乎。曰。非也。我以過
去迦葉佛時。爲高座法師。讚揚佛法。自爾四十九
億歲。生人天中。口出此香。王聞益敬。今云優鉢華
香。常從口出者。亦以勸人往聽。讚經深妙之所致
也。餘準長行可知。

三頌暫聽功德

追頌

若故詣僧坊。欲聽法華經。須臾聞歡喜。今當說其福。
後生天人中。得妙象馬車。珍寶之輦輿。及乘天宮殿。
四頌暫勸功德

若於講法處。勸人坐聽經。是福因緣得。釋梵轉輪座。
五頌誠聽功德

何況一心聽。解說其義趣。如說而修行。其福不可限。
若準長行。乃命觀誠勸功德。而與况顯。今既不接
彼文。又無命觀之語。蓋卽承上暫勸功德。而况顯
之。言暫勸功德。尚得釋梵轉輪之座。何況一心誠
聽。又能解說修行。其福德自不可限也。別明五種

功德竟。

三總顯六根清淨

品題云

妙法蓮華經法師功德品第十九

凡所受持。皆稱法師。六根清淨。俱名功德。此品從
始至終。無非發明乎此。故以名品。若對前望後。亦
有五義。一對別彰總。以前品明德。別依其類。此品
言功。總顯根淨故。二依經顯性。以衆生根性。雖自
徧周。必借經功。乃能顯發故。三依法會境。以六塵
境界。雖皆惟心。必資法力。乃能融會故。四卽因驗
果。以見聞覺知。旣皆同佛。驗知當來成佛無疑故。

五借今引昔。以不輕根淨。事在往昔。仗境方說。用此引起故。總言必至根淨。乃見法師行成。果到行成。自致六根清淨。爲驗法師行業虛實。備顯六根功德優劣。以是因緣。故說此品。經文分二

一指人總標二分德別列 初

爾時佛告常精進菩薩摩訶薩。若善男子。善女人。受持是法華經。若讀若誦。若解說。若書寫。是人當得八百眼功德。千二百耳功德。八百鼻功德。千二百舌功德。八百身功德。千二百意功德。以是功德。莊嚴六根。皆令清淨。

六根清淨。非精進莫克。故此品以常精進爲當機。受持者。諸行之總。讀誦等。受持之別。總別合舉。故云受持是經。若讀若誦等。準楞嚴六根之中。各各功德。有千二百。若隨順世間。尅定優劣。則有八百千二之別。如眼觀見。後暗前明。前方全明。後方全暗。左右旁觀。三分之二。三分言功。一分無德。是故眼惟八百功德。如耳周聽。十方無遺。動若邇遙。靜無邊際。是故耳根圓滿一千二百功德。如鼻嗅聞。通出入息。有出有入。而缺中交。三分缺一。是故鼻惟八百功德。如舌宣揚。盡諸世間出世間智。言有

方分。理無窮盡。是故舌根圓滿一千二百功德。如身覺觸。識於違順。合時能覺。離中不知。離一合雙。三分闕一。是故身惟八百功德。如意默容。十方三世。世出世法。惟聖與凡。無不包容。盡其涯際。是故意根圓滿一千二百功德。然此六根功德。一切衆生。本自具足。但以循塵流轉。遂成隔越。今以受持是經。心悟實相。外不循塵。脫粘內伏。內不循根。寄根明發。故曰是人當得八百眼功德。乃至千二百意功德也。以是功德。爲六根之勝用。故云莊嚴。得是莊嚴。脫六塵之粘妄。故云清淨。指人總標竟。

二分德別列六 一眼根功德二耳根功德三鼻
根功德四舌根功德五身根功德六意根功德

初二 一長行二偈頌 初

是善男子善女人。父母所生清淨肉眼。見於三千大
千世界。內外所有。山林河海。下至阿鼻地獄。上至有
頂。亦見其中一切衆生。及業因緣果報生處。悉見悉
知。

父母所生。卽現前浮塵根也。六妄不粘。故云清淨
肉眼。三千世界等。約依報橫論。下至阿鼻等。約依
報豎論。亦見其中等。約正報總論。及業因緣等。約

正報別論。眼根與意根互用。故云悉見悉知。既悉見悉知。則隨在何地。隨在何類。無不可化之生矣。

二偈頌

標頌云

爾時世尊欲重宣此義。而說偈言。正頌若於大眾中。以無所畏心。說是法華經。汝聽其功德。是人得八百功德殊勝眼。以是莊嚴故。其目甚清淨。父母所生眼。悉見三千界。內外彌樓山。須彌及鐵圍。并諸餘山林。大海江河水。下至阿鼻獄。上至有頂處。其中諸衆生。一切皆悉見。雖未得天眼。肉眼力如是。

諸行之中。獨約說法論功者。餘非不兼。惟說爲勝。

也殊勝者。異常眼故。彌樓須彌在世界中央。鐵圍
爲世界邊際。故以內外別之。一切悉見者。總該行
業。因緣果報等事。然此皆天眼分際。今以功德力
故。浮根能見。故云雖未得天眼。肉眼力如是也。眼
根功德竟。

二耳根功德二 一長行二偈頌 初三 一總

標根量二別列衆聲三結要該廣 初

復次常精進。若善男子。善女人。受持此經。若讀若誦。
若解說。若書寫。得千二百耳功德。以是清淨耳。聞三
千大千世界。下至阿鼻地獄。上至有頂。其中內外種。

種語言音聲。

大千界中。復有小千中。千之隔。故云內外。語言者。詮法之聲。音聲者。無詮之語。聲總語別。故下文惟約聲列。二別列衆聲二。一雜然近陳聲二異類遠住聲。初。

象聲。馬聲。牛聲。車聲。啼哭聲。愁歎聲。螺聲。鼓聲。鐘聲。鈴聲。笑聲。語聲。男聲。女聲。童子聲。童女聲。法聲。非法聲。苦聲。樂聲。凡夫聲。聖人聲。喜聲。不喜聲。

象馬牛車。謂畜生鳴喚。及輪轂動轉聲也。啼哭愁歎。悲哀聲也。螺鼓鐘鈴。鼓吹擊撞聲也。笑語男女。

誼譁剛柔大小聲也。法與非法。邪正聲也。苦聲樂聲。楚拷歌舞聲也。凡夫聖人有漏無漏聲也。喜與不喜。慶幸如常聲也。然此諸聲。雖雜然近陳於前。而同時分別不謬。如是則應機說法。自無不對之機矣。二異類遠住聲。

天聲。龍聲。夜叉聲。乾闥婆聲。阿修羅聲。迦樓羅聲。緊那羅聲。摩睺羅伽聲。火聲。水聲。風聲。地獄聲。畜生聲。餓鬼聲。比丘聲。比丘尼聲。聲聞聲。辟支佛聲。菩薩聲。佛聲。

天龍等八部聲也。火聲等。三灾聲也。地獄等。三途

聲也。比丘等。小乘聲也。菩薩等。大乘聲也。然此諸聲。雖散住異域之遠。而應時圓聞無礙。如是則尋聲現身。自無不及之處矣。別列衆聲竟。

三結要該廣

以要言之。三千大千世界中。一切內外。所有諸聲。雖未得天耳。以父母所生清淨常耳。皆悉聞知。如是分別種種音聲。而不壞耳根。

餘聲尚多。不能俱悉。將略該廣。故云以要言之。內該近陳。外該遠住。皆悉聞知者。不惟聞聲。兼能知義。如秀支替戾岡。僕谷劬禿當。及齊師犯我疆。禦

之勿徬徨等。卽其事也。聞此而不聞彼。耐少而不耐多。宜靜而不宜亂。皆名耳壞。今俱不爾。故名不壞耳根。長行竟。

二偈頌

標頌云

爾時世尊。欲重宣此義。而說偈言。

正頌分三

一頌總標根量。二頌別列衆聲。三頌結要該廣。

初

父母所生耳。清淨無濁穢。以此常耳聞。三千世界聲。無濁穢者。不爲衆聲混濁。及雜聲污穢也。

二頌別列衆聲。二一頌雜然近陳聲。二頌異類。

遠住聲 初

象馬車牛聲。鐘鈴螺鼓聲。琴瑟笙篴聲。簫笛之音聲。清淨好歌聲。聽之而不著。無數種人聲。聞悉能解了。首二句同長行。次二句音樂聲也。清淨好歌雅頌聲也。惟其不著。故能俱聞。若著於此。則不能聞於彼矣。無數種人。總該男女凡聖等聲。既辨其音。復達其意。故云悉能解了。

二頌異類遠住聲二 一善道惡道聲二 因人果人聲 初

又聞諸天聲。微妙之歌音。及聞男女聲。童子童女聲。

山川險谷中。迦陵頻伽聲。命命等諸鳥。悉聞其音聲。
地獄衆苦痛。種種楚毒聲。餓鬼飢渴逼。求索飲食聲。
諸阿修羅等。居在大海邊。自共言語時。出於大音聲。
如是說法者。安住於此間。遙聞是衆聲。而不壞耳根。
十方世界中。禽獸鳴相呼。其說法之人。於此悉聞之。
其諸梵天上。光音及徧淨。乃至有頂天。言語之音聲。
法師住於此。悉皆得聞之。

諸天歌音者。天上娛樂之聲。及聞男女等。異界有
情之聲。山川險谷等。絕域珍禽之聲。命命亦云共
命。一身二頭。神識各異。勝天王名生生。涅槃名耆

婆耆婆。皆此鳥也。地獄衆苦等。惡道之聲。準楞嚴
修羅有四。今云居大海邊。應是濕生修羅。畜生趣
攝。禽獸鳴相呼者。禽言獸語。同類呼喚聲也。其諸
梵天上者。別指色界諸天。光音者。二禪之三。徧淨
者。三禪之三。有頂者。四禪之九。不言餘天者。超略
說耳。準長行有八部。三災。三途之聲。今此中廣三
途。該三災。廣天衆。該餘部。蓋前後互出耳。

二因人果人聲

一切比丘衆。及諸比丘尼。若讀誦經典。若爲他人說。
法師住於此。悉皆得聞之。復有諸菩薩。讀誦於經法。

若爲他人說。撰集解其義。如是諸音聲。悉皆得聞之。
諸佛大聖尊。教化衆生者。於諸大會中。演說微妙法。
持此法華者。悉皆得聞之。

比丘及尼。亦該聲聞辟支。指小乘因果人也。因中
習小。故曰讀誦經典。果中教人。故曰爲他人說。菩
薩者。大乘因人。因中卽能自他兩利。故云讀誦經
法。爲他人說。復欲其布在方策。傳之永久。故云撰
集解義。撰集解義者。著書立言之稱也。如是音聲。
悉皆能聞。自無煩百城烟水之勞矣。諸佛者。大乘
果人。果中酌因酌請。故云教化衆生。大會說法。持

法華者悉皆得聞。自不須徧歷恒沙之土矣。據此則無緣三登有志九上者。於此經宜盡心焉。頌別列衆聲竟。三頌結要該廣。

三千大千界。內外諸音聲。下至阿鼻獄。上至有頂天。皆聞其音聲。而不壞耳根。其耳聰利故。悉能分別知。持是法華者。雖未得天耳。但用所生耳。功德已如是。長行云清淨常耳。此云其耳聰利。由清淨故聰利。文別義同。耳根功德竟。

三鼻根功德二 一長行二偈頌 初三 一總標根量二別列衆香三結其功德 初

復次常精進。若善男子。善女人。受持是經。若讀若誦。若解說。若書寫。成就八百鼻功德。以是清淨鼻根。聞於三千大千世界。上下內外。種種諸香。

上至有頂。下至阿鼻。內至須彌。外至鐵圍。故云上下內外。二別列衆香三。一人間香。二天上香。

三聖人香 初

須曼那華香。闍提華香。末利華香。瞻蔔華香。波羅羅華香。赤蓮華香。青蓮華香。白蓮華香。華樹香。果樹香。旃檀香。沉水香。多摩羅波香。多伽羅香。及千萬種和香。若末。若丸。若塗香。持是經者。於此間住。悉能分別。

○又復別知衆生之香。象香馬香。牛羊等香。男香女香。童子香。童女香。及草木叢林香。若近若遠。所有諸香。悉皆得聞。分別不錯。

初衆生同知香。須曼那。此云善攝意。闍提。此云金錢。末利。此云鬘。瞻蔔。此云黃。波羅羅。此云薰。多摩羅波。此云性無垢。多伽羅。此云木。和末。丸塗者。衆香和合。爲末。爲丸。爲塗。或佩。或燒。或摩身也。於此間住。悉能分別者。必能以此而作佛事。如華嚴鬻香長者。獨據此門。而爲善財勝友。○又復下。法師別知香。象馬牛羊等。本無有香。時或有臭。今以根

清淨故。別有真香。草木叢林亦爾。故謂別知香也。
若近若遠。分別不錯者。不惟能辯其香。且能知其
性情。識其趣向。別其種類。有以益之。有以成之。有
以用之也。二天上香

持是經者。雖住於此。亦聞天上諸天之香。波利質多
羅。拘鞞陀羅樹香。及曼陀羅華香。摩訶曼陀羅華香。
曼殊沙華香。摩訶曼殊沙華香。旃檀沉水。種種末香。
諸雜華香。如是等天香和合。所出之香。無不聞知。○
又聞諸天身香。釋提桓因。在勝殿上。五欲娛樂。嬉戲
時香。若在妙法堂上。爲忉利諸天說法時香。若於諸

園。遊戲時香。及餘天等男女身香。皆悉遙聞。如是展轉。乃至梵世。上至有頂。諸天身香。亦皆聞之。○并聞諸天所燒之香。

初諸天無情香。波利質多羅。此云圓生。卽序分天樹王也。拘鞞陀羅。此云大遊戲地。約所依之處爲名。○又聞下。諸天有情香。勝殿乃帝釋私殿。與采女娛樂之處。昔目連所焚者是也。妙法堂乃帝釋公堂。與諸天集會之處。諸齋日議事者是也。諸園如歡喜園等。乃諸天遊戲之處。然而心隨境轉。香逐時遷。故勝殿法堂諸園等。各各不同。餘天者。下

該四王。上該夜摩。乃至他化天等。梵世至有頂者。中該色界諸天。既勝劣不同。而身香亦異。○并聞下。諸天所燒香。聞者。兼知燒香意也。

三聖人香

及聲聞香。辟支佛香。菩薩香。諸佛身香。亦皆遙聞。知其所在。

二乘權聖。知其所在而接引之。菩薩分聖。知其所在而親近之。諸佛至聖。知其所在而供事之。是知之誠有益也。別列衆香竟。

三結其功德

雖聞此香。然於鼻根不壞不錯。若欲分別。爲他人說。憶念不謬。

受熏已久。都無所聞。曰壞。雖有所聞。不能分別。曰錯。今有香必聞。聞而能別。故云不壞不錯。分別憶念屬意根。爲他人說。屬舌根。二根與鼻根互用。故不謬也。長行竟。

二偈頌

標頌云

爾時世尊。欲重宣此義。而說偈言。

正頌分三

一頌總標根量。二頌別列衆香。三頌結其功德。

初

是人鼻清淨。於此世界中。若香若臭物。種種悉聞。知準前後俱云香。此兼言臭者。不壞世相故。若約能聞。香臭俱不可得。總爲一真香也。

二頌別列衆香

長行惟三。今有補頌。分四。

一頌人間香。二補雜

類香。三頌天上香。四頌聖人香。初

須曼那闍提。多摩羅旃檀。沉水及桂香。種種華果香。及知衆生香。男子女人香。說法者遠住。聞香知所在。○大勢轉輪王。小轉輪及子。羣臣諸宮人。聞香知所在。身所著珍寶。及地中寶藏。轉輪王寶女。聞香知所在。諸人嚴身具。衣服及纓絡。種種所塗香。聞香知其

身。

初略頌長行。大勢下。補頌餘香。輪王子臣等。有可化者。有可避者。知其所在。庶去就得便矣。地中寶藏。輪王寶女。惟供輪王受用。餘人不知。今旣聞香能知。而又何羨於輪王乎。但聞嚴具。便知爲何等身者。不須視以觀由。自無失人。及失言之過也。

二補雜類香

諸天若行坐。遊戲及神變。持是法華者。聞香悉能知。諸樹華果實。及蘇油香氣。持經者住此。悉知其所在。諸山深險處。旃檀樹華敷。衆生在中者。聞香悉能知。

鐵圍山大海。地中諸衆生。持經者聞香。悉知其所在。
阿修羅男女。及其諸眷屬。鬪諍遊戲時。聞香皆能知。
曠野險隘處。師子象虎狼。野牛水牛等。聞香知所在。
若有懷妊者。未辯其男女。無根及非人。聞香悉能知。
以聞香力故。知其初懷妊。成就不成就。安樂產福子。
以聞香力故。知男女所念。染欲癡恚心。亦知修善者。
地中衆伏藏。金銀諸珍寶。銅器之所盛。聞香悉能知。
種種諸瓔珞。無能識其價。聞香知貴賤。出處及所在。
遊戲之樂。神變之奇。皆諸天殊勝之福。聞香能知。
則天福無容羨矣。奇華異果。蘇油香氣。皆人間費。

求之物。知其所在。則所需無煩求矣。旃檀華敷。氣壓伊蘭。衆生在中。應爲所壓。今乃因香得知。則鼻根之圓而入微也。鐵圍有幽冥。大海有龍宮。地中有阿鼻。聞香知在。則救度得便矣。修羅鬪諍。瞋狠特過。眷屬遊戲。放逸實甚。聞香能知。將必有以釋之。有以警之。曠野值師象。必爲所傷。險隘遇虎等。莫之能避。知其所在。防於未來。自不受其害也。知妊中男女。乃至成就。不成就等。亦足駭彼愚蒙。引生正信。但不可專意爲此。以顯神異。知男女染欲癡恚。方便破除。知地中伏藏寶物。方便指授。亦皆

乘機破惡。隨緣利人。至於種種瓔珞。識其貴賤。出
在。雖似世技。而一切智中。缺一不圓。世技豈可少
耶。問。此中諸天華果。男女衆生等。似與前後重複。補此取何意耶。答。前後三科。各依其類。雖顯圓聞。未極通融。今此中忽說天上。又說人間。正論有情。旋論無情。意明雜然交陳。分別無礙。鼻根圓聞之旨。益見之也。三頌天上香

天上諸華等。曼陀曼殊沙。波利質多樹。聞香悉能知。
天上諸宮殿。上中下差別。衆寶華莊嚴。聞香悉能知。
○天園林勝殿。諸觀妙法堂。在中而娛樂。聞香悉能
知。諸天若聽法。或受五欲時。來往行坐臥。聞香悉能
知。天女所著衣。好華香莊嚴。周旋遊戲時。聞香悉能

法華指掌疏
知。如是展轉上。乃至於梵世。入禪出禪者。聞香悉能知。光音徧淨天。乃至於有頂。初生及退沒。聞香悉能知。

初頌諸天無情香。諸天宮殿。高低勝劣不同。寶華莊嚴。香亦各異。故統言上中下差。○天園下。頌諸天有情香。諸天者。下該四王。上該夜摩等。入禪出禪者。定時散時香也。初生退沒者。升時墜時香也。準長行更有所燒之香。偈略不頌。

四頌聖人香

諸比丘衆等。於法常精進。若坐若經行。及讀誦經典。

或在林樹下。專精而坐禪。持經者聞香。悉知其所在。菩薩志堅固。坐禪若讀誦。或爲人說法。聞香悉能知。在在方世尊。一切所恭敬。愍衆而說法。聞香悉能知。衆生在佛前。聞經皆歡喜。如法而修行。聞香悉能知。諸比丘等。總該聲聞辟支。讀誦修慧。坐禪習定。皆自利也。菩薩志固。揀非初心。可比禪誦自修說法。爲人兼兩利也。在在世尊。總指十方諸佛。一切恭敬。機感盈前也。愍衆說法。大悲普度也。末四句。聞法修行。長行所無。而偈頌補之。頌別列衆香竟。

三頌結其功德

雖未得菩薩。無漏法生鼻。而是持經者。先得此鼻相。無漏法生。慧鼻也。以是修習無漏淨法之所生故。鼻根功德竟。

四舌根功德二 一總標德數二別列衆德 初復次常精進。若善男子。善女人。受持是經。若讀若誦。若解說。若書寫。得千二百舌功德。

二別列衆德二 一長行二偈頌 初四 一變味成美二說法投機三感衆聽法四得聖護念

初

若好若醜。若美不美。及諸苦澀物。在其舌根。皆變成

上味。如天甘露。無不美者。

好謂妙食。醜謂麤食。美者極好之食。不美者。但平常之食也。變成上味。如天甘露者。舌根淨故。別有真味。故昔人有性定。菜根香之句也。然世人傷殺生命。造諸惡業。每由三寸舌根。今無不美。則麤食可常食矣。二說法投機。

若以舌根。於大衆中。有所演說。出深妙聲。能入其心。皆令歡喜快樂。

咸通真實曰深。巧被羣機曰妙。能入其心。皆令喜樂者。正由深而妙也。三感衆聽法。

又諸天子天女。釋梵諸天。聞是深妙音聲。有所演說。言論次第。皆悉來聽。及諸龍。龍女。夜叉。夜叉女。乾闥婆。乾闥婆女。阿修羅。阿修羅女。迦樓羅。迦樓羅女。緊那羅。緊那羅女。摩睺羅伽。摩睺羅伽女。爲聽法故。皆來親近。恭敬供養。○及比丘比丘尼。優婆塞。優婆夷。國王王子。羣臣眷屬。小轉輪王。大轉輪王。七寶千子。內外眷屬。乘其宮殿。俱來聽法。○以是菩薩善說法故。婆羅門居士。國內人民。盡其形壽。隨侍供養。

初感八部男女。言論次第者。從淺至深。不越不亂。由此易入。故感天衆來聽。餘部亦然。故云爲聽法。

故皆來近供。○及比下。感四衆王臣。國王散粟王也。小轉輪王者。銀輪。銅輪。鐵輪。惟金輪統攝四洲。乃名爲大。七寶者。一輪。二珠。三象。四馬。五將軍。六主藏。七玉女。凡有輪王出世。自然涌現。各具勝妙之功。故稱爲寶。千子者。輪王之子。以輪王出世。法爾有若干子也。乘其宮殿者。謂輪王福德殊勝。所依宮殿。常與俱故。○以是下。感賢善人民。盡壽者。終身不離。隨侍者。左右供給。此皆由於舌根淨故。音聲深妙之所感耳。

四得聖護念

又諸聲聞辟支佛菩薩諸佛常樂見之是人所在方面諸佛皆向其處說法悉能受持一切佛法又能出於深妙法音。

常樂見之者時懷眷念向其說法者遙垂護持由此智慧益增故能受持一切佛法舌辯愈勝故能出於深妙法音長行竟。

二偈頌

標頌云

爾時世尊欲重宣此義而說偈言。

正頌分四

一頌變味成美二頌說法投機三頌感衆聽法四

頌得聖護念 初

是人舌根淨。終不受惡味。其有所食噉。悉皆成甘露。

二頌說法投機

以深淨妙聲。於大衆說法。以諸因緣喻。引導衆生心。聞者皆歡喜。設諸上供養。

長行但云深妙。今復言淨者。以如法如律故也。

三頌感衆聽法

諸天龍夜叉。及阿修羅等。皆以恭敬心。而共來聽法。是說法之人。若欲以妙音。徧滿三千界。隨意卽能至。大小轉輪王。及千子眷屬。合掌恭敬心。常來聽受法。諸天龍夜叉。羅刹毘舍闍。亦以歡喜心。常樂來供養。

梵天王魔王自在大自在。如是諸天衆常來至其所。
首四句。頌八部略八部女也。等之一字。總該餘部。
次八句。頌王臣略四衆也。文雖無臣。眷屬可攝。後
八句。廣前八部略賢善及人民也。

四頌得聖護念

諸佛及弟子。聞其說法音。常念而守護。或時爲現身。
念謂眷念。常樂見之也。護謂冥加。向其說法也。現
謂顯護。長行所無。偈頌補之。餘不頌。舌根功德竟。
五身根功德二。一總標德數。二別列衆德。初
復次常精進。若善男子善女人。受持是經。若讀若誦。

若解說。若書寫。得八百身功德。

二別列衆德二 一長行二偈頌 初二 一體

絕垢染二用能現相 初

得清淨身。如淨琉璃。衆生喜見。

城東老母。不喜見佛。則佛不能度。今日喜見。則衆生可度矣。二用能現相

其身淨故。三千大千世界衆生。生時死時。上下好醜。生善處惡處。悉於中現。及鐵圍山。大鐵圍山。彌樓山。摩訶彌樓山等諸山。及其中衆生。悉於中現。下至阿鼻地獄。上至有頂。所有及衆生。悉於中現。○若聲聞。

辟支佛菩薩諸佛說法。皆於身中現其色相。

初能現六凡。三千大千。約依報橫論。生時者。識性初託。死時者。眼光已謝。識性初託。或受人天之身。或受惡道之身。故云上下好醜。眼光已謝。或感刀山劒樹。或感淨土華林。故云生善惡處。外而大小鐵圍。內而大小彌樓。其間各有衆生。世所不見。悉於法師身中現之。下至上至。約依報豎論。所有指中間器界。衆生。指中間根身。言器界根身。皆於法師身中現也。○若聲下。能現四聖。然四聖固有權實。六凡亦分善惡。人惟不見。不知修斷捨求。今旣

皆現。是法師於清淨身中。爲諸衆生。現種種因果。作種種佛事。令諸衆生。修善斷惡。捨權求實也。長

行竟。二偈頌

標頌云

爾時世尊。欲重宣此義。而說偈言。

正頌分二

一頌體絕垢染。二頌用能現相。初

若持法華者。其身甚清淨。如彼淨琉璃。衆生皆喜見。

二頌用能現相

又如淨明鏡。悉見諸色像。菩薩於淨身。皆見世所有。惟獨自明了。餘人所不見。○三千世界中。一切諸羣萌。天人阿修羅。地獄鬼畜生。如是諸色像。皆於身中

現諸天等宮殿。乃至於有頂。鐵圍及彌樓。摩訶彌樓山。諸大海水等。皆於身中現。諸佛及聲聞。佛子菩薩等。若獨若在衆。說法悉皆現。○雖未得無漏。法性之妙身。以清淨常體。一切於中現。

初標見揀餘。由鏡淨明。故能見諸色像。因身清淨。故能見世所有。故以爲喻。獨自明了者。如持鏡人。故餘人不見者。如背鏡人故。要知淨身現像。本爲示諸衆生。衆生自障不見。非法師咎。亦如持鏡者。願人共照。人自背鏡。豈持鏡者過耶。○三千下。約義正頌。大同長行。在文可會。○末四句。補頌總結。

無漏法性之身。惟佛果方圓。故云未得。然以持經力故。能令父母所生之身。應念清淨。猶如琉璃。故云以清淨常體。一切於中現身。根功德竟。

六意根功德二 一總標德數二別列衆德 初

復次常精進。若善男子。善女人。如來滅後。受持是經。若讀若誦。若解說。若書寫。得千二百意功德。

二別列衆德二 一長行二偈頌 初三 一能

達法義二能知衆心三能合成典 初

以是清淨意根。乃至聞一偈一句。通達無量無邊之義。解是義已。能演說一句一偈。至於一月四月。乃至

一歲諸所說法。隨其意趣。皆與實相不相違背。若說俗間經書。治世語言。資生業等。皆順正法。

飲大海一掬一滴。俱得百川之味。聞佛經一偈一

句。統攝諸法之宗。故能通達無量無邊之義。解是

無量無邊義已。如解而說。故能演一句一偈而至

一月一際一歲也。

西域四月爲一際。三際爲一歲。

既至一月一際

一歲。而諸所說之法。未免意趣各別。雖意趣各別

而不乖本宗。故云皆與實相不相違背。若於其間。

有涉俗間經書。如治世語言。資生事業等。種種紀

載。但不執末。自不違本。故云皆順正法。

治世語言。如此方六。

經諸子。資生事業。
如此方九流百家。

二能知衆心

三千大千世界。六趣衆生。心之所行。心所動作。心所戲論。皆悉知之。雖未得無漏智慧。而其意根清淨如此。

心所游歷曰行。卽明了識隨念分別也。心所施爲曰動作。卽獨頭識計度分別也。行不由真動不從實曰戲論。卽二種意識對境妄現也。皆悉知之。而應之自無謬矣。轉識成智。乃稱無漏智慧。故曰未得。知見自開。不由前塵所起。故云清淨。此隨便暫

結也。三能合成典

是人有所思惟。籌量言說。皆是佛法。無不真實。亦是先佛經中所說。

佛法指現在佛說。先經指過去佛說。皆成典也。然是人以淨意思籌。一言一句。皆出自正知正見。故是佛法。及先經所說。所謂考諸三世而不謬者是也。長行竟。

二偈頌

標頌云

爾時世尊。欲重宣此義。而說偈言。

正頌分四

一頌能達法義。二頌能知衆心。三頌能合成典。四

補能得無畏

初畧頌

是人意清淨。明利無濁穢。以此妙意根。知上中下法。乃至聞一偈。通達無量義。次第如法說。月四月至歲。上中下法。卽三乘法也。

二頌能知衆心

義頌

是世界內外。一切諸衆生。若天龍及人。夜叉鬼神等。其在六趣中。所念若干種。持法華之報。一時皆悉知。所念若干。總該長行行作戲論之義。

三頌能合成典

廣頌

十方無數佛。百福莊嚴相。爲衆生說法。悉聞能受持。

思惟無量義。說法亦無量。終始不忘錯。以持法華故。悉知諸法相。隨義識次第。達名字語言。如所知演說。此人有所說。皆是先佛法。

初六句。乃推廣長行思籌言說。不忘不錯。卽長行皆是佛法。無不真實義也。上中下法。施設不同。名曰法相。空假中義。布置各別。名曰次第。知此識此。則教有先後。而學不躐等也。名字者。如殊方稱謂。語言者。如異地鄉談。能達乎此。則蠻貊可化。而中邊俱被也。如所知說。皆先佛法者。知見同佛故。四補能得無畏。

以演此法故。於衆無所畏。持法華經者。意根淨若斯。雖未得無漏。先有如是相。是人持此經。安住希有地。爲一切衆生。歡喜而愛敬。能以千萬種。善巧之語言。分別而說法。持法華經故。

以演此法故。意根清淨。所說同佛。故於衆無所畏也。持法四句。亦隨便暫結之語。是人七句。乃出成無畏之由。無畏之由有三。一者住希有地。自信如佛故。二者衆生喜愛。生如佛想故。三者辯才無礙。說法善巧故。在文次第可見。末句歸功持經。言如上所說。雖由根淨。而根淨之故。畢竟由於持經得。

也。讚持論德竟。

二引事證益

上言持經利益。恐難取信。故引不輕之事以證之。品題云。

妙法蓮華經常不輕菩薩品第二十

不輕之名。經文自釋。以此品具明其事。事依人立。故惟以人名品。若據文尋義。亦應有五。一爲前明誹謗。獲大罪報。今借上慢墮獄。驗知不虛故。二爲向明受持。獲諸功德。今借不輕根淨。證成非妄故。三爲凡有聞法。無不成佛。今借誹謗爲種。况顯信受故。四爲凡有通經。俱獲勝益。今借徧記成因。况顯全持故。五爲無量劫來。爲衆弘法。令衆知恩思

報。以便護持故。總言言不虛發。發必從實。前旣讚持論德。此卽引事證益。爲發衆信。故說此品。經文分二

一承前雙開二益二歷引往事證釋 初

爾時佛告得大勢菩薩摩訶薩。汝今當知。若比丘比丘尼優婆塞優婆夷持法華經者。若有惡口罵詈誹謗。獲大罪報。如前所說。其所得功德。如向所說。眼耳鼻舌身意清淨。

不輕之行。必深證實相平等。具大勢力者。乃能體任。故以得大勢爲當機。獲大罪報。如前所說者。如法師品言。甚於罵佛。譬喻品言。命終墮獄。獄畢轉

畜等。此遠承前文。以開遮謗益也。所得功德。如向所說者。向與上同。以上品備言六根功德。此近承上文。以開獲德益也。

二歷引往事證釋二 一長行二偈頌 初四

一遠舉威音二雙標二人三正明往事四讚經結

勸 初二 一正舉初佛二兼出二萬 初不輕

權輿此時故云正舉。

得大勢。乃往古昔。過無量無邊不可思議阿僧祇劫。有佛名威音王。如來應供。正徧知。明行足。善逝。世間解。無上士。調御丈夫。天人師。佛世尊。劫名離衰。國名

大成。○其威音王佛。於彼世中。爲天人阿修羅說法。爲求聲聞者。說應四諦法。度生老病死。究竟涅槃。爲求辟支佛者。說應十二因緣法。爲諸菩薩。因阿耨多羅三藐三菩提。說應六波羅密法。究竟佛慧。○得大勢。是威音王佛。壽四十萬億那由他恒河沙劫。正法住世劫數。如一閻浮提微塵。像法住世劫數。如四天下微塵。

初時名劫國。乃往古昔等。極言其時之遠也。佛名威音王者。要解云。以大音聲。普徧世界。爲諸法王。說法無畏也。劫名離衰者。大成云。時清道泰。正法

興隆離諸衰惡故。國名大成者。彼佛住世既久。所應成就者。皆以大法而成就故。必兼時名。刼國而敘者。顯不輕發覺有時。秉承有佛。刼國名字。歷然可證也。○其威下一化始終。因菩提說六度者。以修習六度。能到菩提故。時至機熟。會三歸一。故云究竟佛慧。必兼一化敘者。顯不輕弘道。亦因受化之深。乘願酬恩耳。○得大下壽命正像。以不輕行道。在像法之際。故并敘之。

二兼出二萬

以非事本故云兼出。

其佛饒益衆生已。然後滅度。正法像法滅盡之後。於

此國土。復有佛出。亦號威音王。如來應供。正徧知。明行足。善逝。世間解。無上士。調御丈夫。天人師。佛。世尊。如是次第有二萬億佛。皆同一號。

必出此者。顯不輕行道在初佛之後。後佛之先。有繼往開來之功故。又一時結緣。二萬億佛所常教化故。遠舉威音竟。

二雙標二人

最初威音王如來。旣已滅度。正法滅後。於像法中。增上慢比丘。有大勢力。爾時有一菩薩比丘。名常不輕。欲護已短。交結權貴。仗彼聲勢。爲害於人。故云有

大勢力。爲度慢衆。持心忍辱。依我慈力。不蔑於他。故曰名常不輕。

三正明往事三

一徧記致謗二弘經蒙化三成

道得果

初二

一不輕徧記二上慢毀謗

初

得大勢。以何因緣。名常不輕。○是比丘凡有所見。若比丘比丘尼。優婆塞優婆夷。皆悉禮拜讚歎。而作是言。我深敬汝等。不敢輕慢。所以者何。汝等皆行菩薩道。當得作佛。而是比丘。不專讀誦經典。但行禮拜。乃至遠見四衆。亦復故往禮拜讚歎。而作是言。我不敢輕於汝等。汝等皆當作佛。

初徵起得名因緣。○是比下詳引本行以釋。凡有所見者。對下遠見。應指近見。近見言詳。故先標次徵。後釋。汝等句。教以皆當行道。當得句。示以成佛無虛。蓋不輕深見實相平等。佛性無二。故作如是言也。不專讀誦者。非不讀誦。惟不專執。但行禮拜者。非有能所。只管行去。環師所謂持無相經。行無相行是也。遠見則音聲不及。故往乃故意往就。往就倉卒。言不能詳。故但言我不敢輕等。問。引事證益。原爲求人弘經。何故舉一不專讀誦者爲之標榜。答。此經大義。總爲指示成佛。不輕亦爾。是則一音可敵全經。到處無非靈鷲。且必深證實相平等者。乃能如此。彼尋行數墨者。豈足以語此哉。

二上慢毀謗

四衆之中。有生瞋恚。心不淨者。惡口罵詈。言是無智比丘。從何所來。自言我不輕汝。而與我等授記。當得作佛。我等不用如是虛妄授記。○如此經歷多年。常被罵詈。不生瞋恚。常作是言。汝當作佛。說是語時。衆人或以杖木瓦石而打擲之。避走遠住。猶高聲唱言。我不敢輕於汝等。汝等皆當作佛。○以其常作是語。故增上慢比丘。比丘尼。優婆塞。優婆夷。號之爲常不輕。

初聞記毀謗。瞋恚者。瞋以妄記。恚其不自揣也。是

皆由於上慢在懷。故云心不淨者。不信自己是佛。
以謂禮我者爲愚癡之行。故罵以無智比丘。不知
如來所遣。反謂若彼者。真無藉之徒。故罵以從何
所來。謂以自言等者。斥其不揣。妄與授記。說以不
用等者。令其自退。莫再煩瀆。蓋深惡而痛絕之意。
○如此下。久行不退。常被罵詈。不生瞋恚者。榮辱
無關。久近一如。常作是言。汝當作佛者。冤親平等。
生佛齊視。或以杖木等。轉見暴惡。避走遠住等。益
顯慈悲。讀是經者。只須向高聲唱處。猛著精采。看
他不輕菩薩。是何等心行。諄諄如此。有何等道理。

法華持掌疏
言念至此。不覺爲他不輕。痛哭流涕。蓋爲夜靜水寒。魚不餌。滿船空載月明歸。○以其下因爲命名。此義蓋爲結釋。以何因緣。名常不輕之徵也。徧記致謗竟。

二弘經蒙化二 一不輕弘經二上慢蒙化 初
是比丘臨欲終時。於虛空中。具聞威音王佛。先所說法華經。二十千萬億偈。悉能受持。卽得如上眼根清淨。耳鼻舌身意根清淨。得是六根清淨已。更增壽命二百萬億那由他歲。廣爲人說是法華經。

欲終者。此報將盡時也。威音已滅。猶聞說法者。顯

法身真常滅而不滅。故雖滅而不滅。而體同太虛。故曰於空。雖體同太虛。而處處顯露。故曰具聞。具聞者。十方虛空。一時同聞也。今日之聞。乃云先所說者。以此道無古無今。今卽古。古卽今。故十方虛空。各攝依正。依正互攝。重重無盡。在在出廣長舌。顯示實相。故云二十千萬億偈。悉能受持者。一受一切受。一持一切持。故然上云具聞。卽是耳根圓通。此云悉能受持。卽是意根圓通。二根旣圓。六俱無礙。故云卽得如上眼根清淨。乃至意根清淨。根旣淨已。卽無明而見佛性。由幻身而證法身。可以

法華指掌疏
轉天壽爲長年。延刹那爲多劫。增壽說經。無足異也。二上慢蒙化

於時增上慢四衆。比丘比丘尼。優婆塞。優婆夷。輕賤是人。爲作不輕名者。見其得大神通力。樂說辯力。大善寂力。聞其所說。皆信服隨從。○是菩薩復化千萬億衆。令住阿耨多羅三藐三菩提。

初見勝歸心。大神通力。卽指更增壽命。樂說辯力。卽指廣說是經。是皆從體起用。由寂發照。故云大善寂力。見有如斯殊勝。故聞其所說。皆信服而隨從之。○是菩下。蒙化住道。千萬億衆。卽前信服隨

從之人信服隨從。自是永無退轉。故云令住菩提。弘經蒙化竟。

三成道得果二 一不輕成道二上慢得果 初

三 一中間值佛二行滿成道三結會古今 初

命終之後。得值二千億佛。皆號日月燈明。於其法中。說是法華經。以是因緣。復值二千億佛。同號雲自在燈王。於此諸佛法中。受持讀誦。爲諸四衆。說此經典。故得是常眼清淨。耳鼻舌身意諸根清淨。於四衆中。說法。心無所畏。

由前廣說是經。諸佛護念不捨。故於命終之後。得

值二千億佛。日月燈明。註見序分。仍說法華者。不忘宿因故。不忘宿因。又感後佛護念。故曰以是因緣。復值二千億佛。無心而徧應十方。有緣而普施慧照。故號雲自在燈王。又威音王。以口輪自在爲名。日月燈。以智輪自在爲名。雲自在。以身輪自在爲名。各取一輪。以該衆德。於此諸佛。非惟指雲自在王。蓋兼前日月燈明而總言之。言不輕於威音像季之時。初得根淨。自爾以來。於此四千億諸佛法中。皆以持說此經力故。獲得六根清淨。說法無畏。是不惟一得永得。抑應以值佛弘法。漸轉漸勝。

也。二行滿成道

得大勢。是常不輕菩薩摩訶薩。供養如是若干諸佛。恭敬尊重讚歎。種諸善根。於後復值千萬億佛。亦於諸佛法中。說是經典。功德成就。當得作佛。

上科云。值佛弘法。修慧也。此科云。供佛種善。修福也。於後復值千萬億佛者。值佛必供。顯福德益廣。亦於諸佛法中說經者。說而必解。顯慧力益深。慧深福廣。二利圓滿。故云功德成就。以因致果。決定無疑。故云當得作佛。

三結會古今

得大勢。於意云何。爾時常不輕菩薩。豈異人乎。則我身是。○若我於宿世。不受持讀誦此經爲他人說者。不能疾得阿耨多羅三藐三菩提。我於先佛所受持讀誦此經爲人說故。疾得阿耨多羅三藐三菩提。

初正以結會可知。○若我下。寓意勸勉。如來意謂我以大乘之器。不因是經。尚不能疾成菩提。必因是經。乃能疾得。況夫小乘聲聞。權教菩薩等。有志菩提者。可不以此經爲先務哉。然佛於往昔。值如許多佛。莊嚴福慧。然後乃成。猶曰疾得菩提。亦爲令見小欲速者。自鄙先心。以成遠大之志也。不輕。

成道竟。二上慢得果。二一中間獲罪。二罪畢。

得果三結會古今。初。

得大勢。彼時四衆比丘比丘尼。優婆塞。優婆夷。以瞋恚意。輕賤我故。二百億劫。常不值佛。不聞法。不見僧。千劫於阿鼻地獄。受大苦惱。

壽量品云。是諸罪衆生。以惡業因緣。過阿僧祇劫。不聞三寶名。譬喻品云。其人命終。入阿鼻獄。具足一劫。劫盡更生。如是展轉。至無數劫。今云二百億劫。及千劫者。猶少言耳。毀謗持法者。可不慎哉。

二罪畢得果

法華指掌疏
畢是罪已。復遇常不輕菩薩教化。阿耨多羅三藐三菩提。

前以聞法生謗。重惡覆善。故先受罪報。此以罪畢善熟。既熟當脫。故復遇教化。如人不欲服藥。強令服之。雖以罵醫致損。終因藥力減病。病減再遇良醫。手到盡除。得聞此法者。宜自慶也。

三結會古今

得大勢。於汝意云何。爾時四衆常輕是菩薩者。豈異人乎。今此會中。跋陀婆羅等五百菩薩。師子月等五百比丘尼。思佛等五百優婆塞。皆於阿耨多羅三藐

三菩提不退轉者是。

跋陀婆羅。名見序分。師子月者。可畏可愛爲名。準正法華云。五百比丘比丘尼。則此脫比丘二字。思佛者。常念佛道。常思見佛。故名也。準正法華偈云。五百清信士。五百清信女。本經後偈亦云。清信士女。則此脫優婆夷句。於菩提不退者。安住實智中。決定當作佛故。然此中。亦寓有勸誡之意。如來意謂。今日之不退。卽昔日之慢流。罪福本無住。善惡皆自取。究無與於佛菩薩也。可弗勉哉。可弗愼哉。正明往事竟。四讚經結勸。

得大勢。當知是法華經。大饒益諸菩薩摩訶薩。能令
至於阿耨多羅三藐三菩提。○是故諸菩薩摩訶薩。
於如來滅後。常應受持讀誦。解說書寫是經。

初指法稱讚。不輕因之成道。上慢由茲得果。故讚
此經有大饒益。○是故下結勸受持可知。長行竟。

二偈頌

標頌云

爾時世尊。欲重宣此義。而說偈言。正頌分四

一頌遠舉威音。二頌雙標二人。三頌正明往事。四

頌讚經結勸

初畧頌不分

過去有佛。號威音王。神智無量。將導一切。天人龍神。

所共供養。

舉初佛。略二萬億佛。舉別號。略通號。刳國舉神智。將導。該一化始終。補天龍供養。略壽命正像。長行。偈頌。對辯。自知。

二頌雙標二人

是佛滅後。法欲盡時。有一菩薩。名常不輕。時諸四衆。計著於法。

長行云。於像法中。此言法欲盡時。蓋像教僅存。而法已危矣。四衆著法者。謂上慢在心。執自所證也。餘同長行。但次第稍異。

法華指掌疏
三頌正明往事三

一頌徧記致謗二頌弘經蒙

化三頌成道得果

初畧頌不分

不輕菩薩往到其所而語之言我不輕汝汝等行道皆當作佛○諸人聞已輕毀罵詈不輕菩薩能忍受之。

初頌不輕徧記○諸人下頌上慢毀謗。

二頌弘經蒙化

此亦畧頌

其罪畢已臨命終時得聞此經六根清淨神通力故增益壽命復爲諸人廣說是經○諸著法衆皆蒙菩薩教化成就令住佛道。

初頌不輕弘經其罪畢已句。準長行應在下科。以是因緣句下。或筆授錯簡。若依文消會者。則是不輕菩薩以四衆輕賤之故。所有宿罪一時了畢。如般若云。是人先世罪業。應墮惡道。以今世人輕賤故。先世罪業。卽爲消滅是也。○諸著下頌上慢蒙化。可知。三頌成道得果。

約義畧頌不分

不輕命終。值無數佛。說是經故。得無量福。漸具功德。疾成佛道。彼時不輕。則我身是。○時四部衆著法之者。聞不輕言。汝當作佛。以是因緣。值無數佛。此會菩薩五百之衆。并及四部清信士女。今於我前聽法者。

是。

初頌不輕成道。雖值無數諸佛。若但修供養。仍屬有漏。今濟以說經之慧。能成無漏。無漏之福。猶如虛空。故云無量。既福慧相濟。自因果圓成。故云具德成道。○時四下頌上慢得果。準長行云。復遇不輕。教化菩提。今言值無數佛。蓋值佛之時。卽是遇不輕時也。若將上科。其罪畢已之句。置於此句之上。方合長行。不然。則但彰音記之功。不顯謗法之罪矣。頌正明往事竟。

四頌讚經結勸

義頌

我於前世。勸是諸人。聽受斯經。第一之法。開示教人。
令住涅槃。世世受持。如是經典。億億萬劫。至不可議。
時乃得聞。是法華經。億億萬劫。至不可議。諸佛世尊。
時說是經。○是故行者。於佛滅後。聞如是經。勿生疑
惑。應當一心。廣說是經。世世值佛。疾成佛道。

初頌指法稱讚。如來意謂。我於前世。所以勸人聽
受斯經者。蓋以斯經是第一之法。能開示教人。令
住涅槃。長行所謂大饒益諸菩薩。能令至於阿耨
菩提是也。世世等言。長行所無。而偈頌補之。如來
意謂。我之所以世世受持者。蓋以此經億億萬劫。

至不可議時乃得聞

云

是故下頌結勸受持。世

世二句。兼示持經益也。引事證益竟。

三發願勸持

品題云

妙法蓮華經如來神力品第二十一

無作妙用。不可思議曰神。成所作事。無能障礙曰力。準經文神力有三。一出廣長舌。上至梵世。二毛孔光明。徧照十方。三瞽欬彈指。音徧地動。是皆佛地位中不可思議妙用。惟佛與佛。乃能顯現。故名如來神力。若論此品。前有發願。後有勸持。而題中但標神力者。以能擴其願輪。感其持經。示徧重也。

若別明者。亦有五義。一爲全彰大用。以收正宗之旨。二爲發願護持。以感知遇之恩。三爲對衆現神。以擴舊住之志。四爲嘉讚經功。以堅涌衆之心。五爲結勸受持。以開流通之緒。總言啐啄同時。父子濟美。讚證之玄音方罷。持說之大願斯開。猶如一堂兩琴。鼓商而商應。鼓宮而宮應。一奩兩鏡。胡來而皆胡。漢來而皆漢。於是示以神力。勸以護持。以終正宗之義。此神力品之所由說也。經文分二

一地涌發願弘經二如來現神勸持 初

爾時千世界微塵等菩薩摩訶薩。從地涌出者。皆於

法華持掌疏
佛前一心合掌瞻仰尊顏。○而白佛言。世尊。我等於
佛滅後。世尊分身所在國土。滅度之處。當廣說此經。
所以者何。我等亦自欲得是真淨大法。受持讀誦。解
說書寫。而供養之。

初指衆敘儀。準地涌品。彌勒偈云。若人行籌數。過
於恒沙劫。猶不能盡知。今以千界微塵等。彼菩薩
之數。豈行籌可計哉。○而白下。發願弘經。欲報知
遇之恩。以顯繼述之善。故發願於分身滅處。廣說
此經。所以下。徵釋發願之意。真指前章。以前章所
顯之實。歷權漸而不遷。故名真也。淨指此章。以此

章所顯之本。當生滅而不染。故名淨也。大指全經。以全經理並雜華。義攝羣典。囊括今古。籠罩十方。貫佛生通凡聖。故名大也。欲得此而受持供養。乃發願於滅後廣說。蓋利他正所以利己。成已乃可以成物也。

二如來現神勸持二 一對衆現神二讚經結勸
初二 一總標二別明 初

爾時世尊於文殊師利等無量百千萬億舊住娑婆世界。菩薩摩訶薩。及諸比丘比丘尼。優婆塞。優婆夷。天龍夜叉。乾闥婆。阿修羅。迦樓羅。緊那羅。摩睺羅伽。

法華指掌疏
人非人等。一切衆前。現大神力。

對彼地涌新出。故指文殊等爲舊住。必於舊住菩薩及四衆八部前。而現神力者。爲示不分而分。分而不分。以擴其心。令知新出之衆。發願分身。實無去來之迹也。必以文殊爲首者。以如來神力。非帶果行。因之聖。及有大智者。不能會此意故。

二別明二 一先以相顯二次以聲示 初

出廣長舌。上至梵世。一切毛孔。放於無量無數色光。皆悉徧照十方世界。衆寶樹下。師子座上諸佛。亦復如是。出廣長舌。放無量光。釋迦牟尼佛。及寶樹下諸

佛現神力時。滿百千歲。

舌爲應機之具。不離此而上至梵世。則梵世有機。亦可卽此而應。光具覺衆之功。不離此而徧照十方。則十方有衆。無煩往彼而覺。是皆不分而分義也。樹下乃分身諸佛。亦復如是等。謂不會而同。不會而同。還同一體。此又分而不分義也。當現神之少時。滿百千之多歲。卽促而延。以百千之多歲。入現神之少時。卽延而促。延促同時。入三世而絕朕。一多無礙。應羣機而無迹。是全體之大用。三世諸佛已證。今證當證。乃利物之神機。三世菩薩已學。

今學當學。讀是經者。若能於喫飯穿衣處留心。則舌相毛光。豈惟佛及分身有耶。

二次以聲示三。一二音徧至二。警覺衆生三成辦利益。初

然後還攝舌相。一時警歎。俱共彈指。是二音聲徧至十方。

舊住之衆。只知向梵世觀舌。十方觀光。不解向喫飯穿衣處理會。只得截斷情塵。另開方便。故云還攝舌相。一時警歎。

云。

舌相相字。應是光字。不然。

則相指光相。以前旣舌光俱舒。此亦舌光俱攝也。

警欬者。虛嗽令轉。彈指者。作聲令覺。讀是經者。既不能出廣長舌。放衆毛光。且看他警欬彈指。畢竟明的甚麼邊事。則庶幾可耳。又此中言一時俱共二音徧至者。亦顯分而不分。不分而分義也。

二警覺衆生二 一地動警覺二天語警覺 初

諸佛世界。地皆六種震動。其中衆生。天龍夜叉。乾闥婆。阿修羅。迦樓羅。緊那羅。摩睺羅伽。人非人等。以佛神力故。皆見此娑婆世界。無量無邊百千萬億衆寶樹下。師子座上。諸佛。及見釋迦牟尼佛。共多寶如來。在寶塔中坐。師子座。又見無量無邊百千萬億菩薩。

摩訶薩及諸四衆恭敬圍繞釋迦牟尼佛。既見是已。皆大歡喜。得未曾有。

二音至處。能令佛界地動者。亦如來不思議力。警覺衆生也。既警覺已。各各回心念佛。故感佛力加被。親見靈山一會。既見是已。有救有歸。故云皆大歡喜。得未曾有。二天語警覺。

卽時諸天於虛空中高聲唱言。過此無量無邊百千萬億阿僧祇世界。有國名娑婆。是中有佛。名釋迦牟尼。今爲諸菩薩摩訶薩說大乘經。名妙法蓮華。教菩薩法。佛所護念。汝等當深心隨喜。亦當禮拜供養釋

迦牟尼佛。

雖因地動回心。見佛歡喜。未能發深遠心。隨喜是經。禮供於佛。故諸天承佛神力。空中唱言。以警覺之。示以依正名號。及所說法者。由彼雖已遙見。猶未知何國何佛。及所說何法耳。以是教菩薩法。故教以發深遠心。而生隨喜。以是佛所護念。故教以禮供於佛。以求加被。警覺衆生竟。

三成辦利益

彼諸衆生聞虛空中聲已。合掌向娑婆世界。作如是言。南無釋迦牟尼佛。南無釋迦牟尼佛。以種種華香。

纓絡幡蓋及諸嚴身之具珍寶妙物皆共遙散娑婆世界所散諸物從十方來譬如雲集變成寶帳徧覆此間諸佛之上於時十方世界通達無礙如一佛土聞虛空聲已知國名娑婆故向以合掌知佛名釋迦故稱名歸依重言南無者表歸敬之至不言禮拜者且稱且禮無煩另敘也以種種供具遙散娑婆者爲欲隨喜是經求佛加被之意所散諸物從十方來者衆生誠意所感譬如雲集變成寶帳者如來慈心所致慈心利物還以自嚴故徧覆此間佛上等觀十方無有限礙故通達如一佛土然如

來以舌相毛光。警欬彈指。近示舊住。遠應十方。能於十方世界。作大佛事。警覺羣生。成辦利益。且令十方合成一界。得此用者。則分身與不分身。咸爲剩語。對衆現神竟。

二讚經結勸二 一長行二偈頌 初三 一承

前起後二嘉讚經功三結勸受持 初

爾時佛告上行等菩薩大衆。諸佛神力。如是無量無邊。不可思議。若我以是神力。於無量無邊百千萬億阿僧祇劫。爲囑累故。說此經功德。猶不能盡。

欲堅涌衆之願。告上行等餘衆也。諸佛神力。如上

所說舌相毛光。彼此俱益。譬欬彈指。詮量不及。故云如是無量無邊。不可思議。以是神力。說此經功。自然音至梵世。聲徧十方。舌覆虛空。言絕方分。且經無量無邊百千萬億僧祇。非暫時說。又是爲囑累故。非泛常說。而猶以爲不能盡者。蓋以佛地功德盡萃於此也。二嘉讚經功。

以要言之。如來一切所有之法。如來一切自在神力。如來一切秘要之藏。如來一切甚深之事。皆於此經宣示顯說。

說不能盡。用少言而攝多義。故云以要言之。一切

所有之法。指從實施權。若二若三之說。一切自在神力。指從本垂迹。若生若滅之現。一切秘要之藏。指會權歸實。無二無三之旨。以是諸佛秘密心要。又能含攝出生無量無邊諸法。故名秘要之藏。一切甚深之事。指會迹歸本。非生非滅之宗。以是如來自所住境。又非一切聲聞辟支之所能及。故云甚深之事。此經前後兩章。總爲發明乎此。故云皆於此經宣示顯說。宗鏡云。微塵經卷。極大千而未展全文。普眼法門。盡大海而不書一偈。况權實本迹。悉備此經。故雖極盡神力。說不能盡也。

三結勸受持

是故汝等於如來滅後。應一心受持。讀誦。解說。書寫。如說修行。○所在國土。若有受持。讀誦。解說。書寫。如說修行。若經卷所住之處。若於園中。若於林中。若於樹下。若於僧坊。若白衣舍。若在殿堂。若山谷曠野。是中皆應起塔供養。所以者何。當知是處。卽是道場。諸佛於此。得阿耨多羅三藐三菩提。諸佛於此。轉於法輪。諸佛於此。而般涅槃。

初正勸受持。○所在下。兼示重處。若有受持等。標持人所住。及經卷所住處也。無論何地。勸應起塔。

者。示以重其處故。所以等言。乃徵釋勸應起塔之意。是處者。卽人經所在處也。人卽能成。經卽所成。故所在之處。卽是道場。是人是經。能令衆生成佛。故云諸佛於此。得阿耨菩提。又人卽能轉。經卽所轉。故云諸佛於此。轉於法輪。是人是經。能令衆生依一佛乘而得滅度。故云諸佛於此。而般涅槃。準阿含。有四處應起塔。一佛生處。二成道處。三轉法輪處。四般涅槃處。今云道場者。謂成道之人。於此而生。卽同生處。餘三如次。所謂皆應起塔者。以此。

長行竟。

二偈頌

標頌云

爾時世尊。欲重宣此義。而說偈言。

正頌
分三

一頌承前起後。二頌嘉讚經功。三頌結勸受持。

初

約義
廣頌

諸佛救世者。住於大神通。爲悅衆生故。現無量神力。
舌相至梵天。身放無數光。爲求佛道者。現此希有事。
諸佛警欬聲。及彈指之聲。周聞十方國。地皆六種動。
以佛滅度後。能持是經故。諸佛皆歡喜。現無量神力。
囑累是經故。讚美受持者。於無量劫中。猶故不能盡。
全體大用。名大神通。惟佛能證。故云住也。爲悅十
方衆生。令其發心。故現無量神力。以資慶躍。舌相

毛光直示本有。故云爲求道者現希有事。譬欬彈指。頓割情塵。故令十方國土地皆震動。此頌長行諸佛神力。如是無量無邊不可思議義也。以佛滅後等者。謂以彼地涌發願滅後持經諸佛皆生歡喜。對衆現神。設我以是神力爲囑累故。讚美持者。縱經無量劫中。猶不能盡。此頌長行。若我以是神力。乃至爲囑累故。說此經功。猶不能盡義也。然長行讚經。偈頌讚持者。以經功無盡。持人之功德亦無盡故。二頌嘉讚經功。約義廣頌

是人之功德。無邊無有窮。如十方虛空。不可得邊際。

○能持是經者。則爲已見我。亦見多寶佛。及諸分身者。又見我今日。教化諸菩薩。能持是經者。令我及分身。滅度多寶佛。一切皆歡喜。十方現在佛。并過去未來。亦見亦供養。亦令得歡喜。諸佛坐道場。所得秘要法。能持是經者。不久亦當得。能持是經者。於諸法之義。名字及言辭。樂說無窮盡。如風於空中。一切無障礙。於如來滅後。知佛所說經。因緣及次第。隨義如實說。如日月光明。能除諸幽冥。斯人行世間。能滅衆生暗。教無量菩薩。畢竟住一乘。

初承前總標。持人功德。如空無邊。正以見經功之

無邊也。○能持下。別以嘉讚。此經是諸佛法身。爲菩薩依止。故凡持此經者。則爲見我。乃至所化菩薩。此經是諸佛慧命。爲三世文軌。故凡能持者。則令三佛歡喜。并三世諸佛歡喜。此經是道場所得。乃秘密心要。故凡能持者。不久亦當自得。此嘉讚自利德也。此經是平等大慧。爲智辯根源。故凡能持者。於諸法得四無礙辯。文中義卽義辯。名卽法辯。言辭卽辭辯。樂說無窮。卽樂說辯。如風二句。乃喻明無礙之義。言風性有聲無住。喻能說無著。空性有名無質。喻所說無體。旣能所皆空。乃徧應一

切而無障無礙。亦如風空俱無。乃徧應萬竅。而彼此不相左也。諸經各有因緣。如阿含因緣保證。方等因緣彈斥。般若因緣淘汰等。所說不無次第。如阿含說在初轉。方等說在中轉。般若說在後轉等。然此等皆載在此經。故凡能持者。雖在佛滅度後。猶能知其因緣。及於次第。隨義者。隨彼諸法之義。如實者。如其所知之實。如是而說。自能三根普被。羣昏並照。故云如日月光明。能除諸幽冥也。斯人二句。結合上喻可知。末二句。言不惟能滅衆暗。而且時至機熟。究竟會三歸一。此嘉讚利他德也。自

利利他。一持經而兼備。則斯經功德。豈言辭所能盡哉。

三頌結勸受持

約義畧頌

是故有智者。聞此功德利。於我滅度後。應受持斯經。是人於佛道。決定無有疑。

前四句承上結勸。後二句釋結勸意。準上自他兩利。一持經而具足。佛道豈有疑哉。兼示重處。從略不頌。然此經前後兩章。雖文有長短。而略明廣明。生疑生信之義。勢如對偶。至於極顯經功。大段亦頗相似。於前有讚經募人。此有讚持論德。前以達多通經。文殊弘法。而證利益不虛。此引不輕成道。

上慢得果以驗功德無妄。此中地涌發願。正對持品之羣賢。前章示以方軌。可配此品之讚勸。雖帶囑累之語。猶屬正宗之義。總結大科。正宗分竟。

三流通分

從源分派。利萬物而長逝。名之曰流。自我及人。衍塵劫而不滯。名之曰通。粵自

靈山囑累。海會如勅。或爲法忘軀。或分燈列燄。或如明鏡當臺。而有像斯現。或如寶月在漢。而是水卽形。或顯密交資。或自他兩利。或取要而由捷徑。或尅期而攝一心。故得微言廣布。在惡世而猶聲優曇常開。當飄零而還色。目曰流通。意在茲也。三一總囑傳持二別示

修法三大衆禮散

初品題云

妙法蓮華經囑累品第二十二

囑謂付囑。俾此法有所屬也。累之一字。有二聲。若

作去聲。則是殃累之累。蓋如來深知末世弘經爲難。意以此法付囑。殃累宣傳。勿得遇緣便退。古德所謂一片慈悲之禍。祖禰不了。殃及兒孫是也。若作上聲。則是積累之累。蓋如來自謂妙法無窮。若已說者。但如手中之葉。其樹上之葉猶多。意以此法付囑。教令積累。勿得以少爲足。如文中勅以應當一心。流布此法。廣令增益是也。若論此品。俱有能囑。所囑受囑。能囑在佛。所囑在法。受囑在衆。題不瑣析。故惟以囑累爲名。若明五義者。一正說旣畢。應囑累故。二三示難得。令珍重故。三自明離過。

令隨學故。四信與不信。教稱量故。五三說奉行。慰
佛心故。總言發願度生。宛如扶六尺之孤。立志弘
法。何啻傳百里之命。不有寄託。終爲大節所奪。故
於神力品後。而繼之以囑累品焉。經文分三

一摩頂囑累二奉教傳持三歡喜圓成 初三

一囑令增益二徵起釋成三教以隨機 初

爾時釋迦牟尼佛。從法座起。現大神力。以右手摩無
量菩薩摩訶薩頂。而作是言。我於無量百千萬億阿
僧祇劫。修習是難得阿耨多羅三藐三菩提法。今以
付囑汝等。汝等應當一心。流布此法。廣令增益。如是

三摩諸菩薩摩訶薩頂而作是言。我於無量百千萬億阿僧祇劫。修習是難得阿耨多羅三藐三菩提法。今以付囑汝等。汝等當受持讀誦。廣宣此法。令一切衆生。普得聞知。

從法座起者。爲法求人。坐不安席也。又殃累宣傳。法不應坐也。欲摩衆頂。必假通用。故云現大神力。無量菩薩。應指地涌之衆。以前文止他召此。蓋爲此也。必摩其頂者。示有所加。令安慰故。示以久修者。令知恩故。又云難得者。令珍重故。教以一心流布者。恐其潦草。應命終不在意。又云廣令增益者。

望其展轉流通。勿滯陳言。蓋爲智同於師。減師半德。智過於師。方堪傳授也。三摩三告者。反覆叮嚀。重其事。竦其心故。受持讀誦等。仍前一心流布。廣令增益之義。但變其文耳。

二徵起釋成

所以者何。如來有大慈悲。無諸慳悋。亦無所畏。能與衆生佛之智慧。如來智慧。自然智慧。如來是一切衆生之大施主。汝等亦應隨學如來之法。勿生慳悋。如來意謂。我之所以諄諄告誡。勅令廣宣此法者。何也。蓋以如來有大慈悲等。汝等亦應隨學。所謂

我既如是。汝亦如是也。若釋其義者。能與智慧之樂。拔愚癡之苦。名爲大慈大悲。如其所得之法。盡以教人。故曰無諸慳吝。有機便說我智無匱。故云亦無所畏。能與等言。乃轉釋無畏等義。蓋以能與故無畏。無畏故無吝。無吝故慈悲大也。佛之智慧。指究竟覺智。以是佛之所證。不共餘乘故。如來智慧。指示成果智。以是從真現起。依如而來故。自然智慧。指觀察妙智。以能不慮而知。自然而應故。能與此者。名爲究竟法施。故云是大施主。亦應隨學等。正明勅令廣宣之意。法謂修行之法。三行之中。

法華指掌疏 卷三
獨戒慳吝者。以無慳則有法盡與。遇機便說。足攝慈悲及無畏故。

三教以隨機

於未來世。若有善男子善女人。信如來智慧者。當爲演說此法華經。使得聞知。爲令其人得佛慧故。若有衆生不信受者。當於如來餘深法中。示教利喜。汝等若能如是。則爲已報諸佛之恩。

隨學佛行。固應盡與佛慧。但恐衆生不能盡受。故教以信者爲說。信者爲說。聞知便入。故云爲令其人得佛慧故。設遇不信。說亦無益。故教以於餘深

法示教利喜。餘深法者。應指終頓二教。以彼對圓名。餘對始說深故也。然終教凡有心者。皆當作佛。頓教狂心歇處。便是菩提。以此示教。易得利喜。況進之可極圓宗。若如是便契佛行。故曰。則爲已報諸佛之恩。摩頂囑累竟。

二奉教傳持

時諸菩薩摩訶薩。聞佛作是說已。皆大歡喜。徧滿其身。益加恭敬。曲躬低頭。合掌向佛。俱發聲言。如世尊勅。當具奉行。唯然世尊。願不有慮。諸菩薩摩訶薩衆。如是三反。俱發聲言。如世尊勅。當具奉行。唯然世尊。

願不有慮。

聞佛囑累。得滿弘經之願。故皆大歡喜。蒙佛摩頂。喜有神力加持。故徧滿其身。所謂通身慶快是也。益加恭敬者。大事在身。蹶蹶弗寧之狀。曲躬低頭者。唯唯聽命。惶恐不安之儀。如世尊勅者。世尊之勅有二。一令廣宣此法。學佛勿悞。一令稱量信否。說誘隨機。一一敬順無違。故云當具奉行。唯然者。猶云唯是如此。唯是如此。無有別意。故願不必有慮。如是三反等者。數數承當。重佛勅。安佛心也。

三歡喜圓成

爾時釋迦牟尼佛。令十方來諸分身佛各還本土。而作是言。諸佛各隨所安。多寶佛塔還可如故。○說是語時。十方無量分身諸佛。坐寶樹下。師子座上者。及多寶佛。并上行等無邊阿僧祇菩薩大衆。舍利弗等。聲聞四衆。及一切世間天人阿修羅等。聞佛所說。皆大歡喜。

初略顯圓成。分身之來。原爲開塔。開塔之後。不遽去者。以釋迦後事未了。今已囑累。更無所事。故請以各隨所安。勿復爲我關心也。多寶佛塔還可如故者。有二釋。一順晉隋二譯。二依什師所譯。晉隋

二譯。此品在後。順此則還可如故之語。應是請歸故都。亦同各隨所安義也。什師所譯。移後居此。依此則還可如故之語。應是照舊留住。以下三品中。猶有多寶事故。二釋之中。在後似長。竊窺什師移此。其意有二。一爲顯此經具三會故。若此品在後。則向下諸品。應是寶塔中說。而妙音品中。我今欲見多寶佛身。惟願世尊。示我令見之語。難以消會。二爲顯流通。自此始。故準古德。或以前品卽爲流通。或以後文猶屬正宗。預防此判。隔以囑累之文。無傷佛意。有禪正解。又大成云。如故者。前開今閉。

自下如來出塔與大衆復降靈山。說後六品經。此但知移品初意。猶未得第二意耳。○說是下大會歡喜。分身多寶。慶斯道之得人。四衆八部。欣當來之有依。故云聞佛所說皆大歡喜。總囑傳持竟。

二別示修法二 一正修之法 二助修之法 初

三一藥王盡執爲法 二妙音忘情弘經 三觀音

遣相圓應 初

品題云

妙法蓮華經藥王菩薩本事品第二十三

二藥普施。二病俱治。故稱藥王。然身燒臂。爲法供佛。是其本事。此品全爲明此。故卽以此命名。若別

明五義者。一爲承願受囑。必當遊化人間。欲假藥王顯遊化之方故。二爲奉命弘經。端賴精進苦行。欲借喜見顯精進之真故。三爲二執不除。動轉皆成障礙。欲就往事爲今日之模故。四爲然身燒臂。名爲眞法供養。欲明持品同持經之德故。五爲男女雖異。佛性由來無二。欲資持經彰平等之理故。總言遊化娑婆。苦行爲首。忍難弘法。精進居先。執盡障除。乃無往而不可。多持少持。任機緣而無礙。男女情盡。佛性理圓。爲明如是等義。故說此品。經文

三分

一宿王因藥王而請問。二如來引本事而垂

答三多寶以有益而讚問 初

爾時宿王華菩薩白佛言。世尊。藥王菩薩云何遊於娑婆世界。○世尊。是藥王菩薩有若干百千萬億那由他難行苦行。善哉世尊。願少解說。○諸天龍神夜叉乾闥婆阿修羅迦樓羅緊那羅摩睺羅伽人非人等。又他國土諸來菩薩。及此聲聞衆。聞皆歡喜。

初總問遊化。宿王者。星宿中王。表智慧自在。華有各種。如金銀草木等。表萬行芬披。蓋以智行相成爲名也。非此菩薩莫契藥王本事故。爲當機。已知遊化娑婆爲藥王本事。但觀現前人多弊惡。不知

彼於宿世云何遊化。故爲問也。○世尊下別問苦行。向聞藥王苦行居多。而其中最難行者。尚有若干百千萬億那由他數。但未得其詳。故求解說。以爲末世弘經者法也。望其必說。故稱善哉世尊。恐難盡明。故云願少解說。蓋求佛於多分事中。少說一二事也。○諸天下指衆聞喜。天龍八部。二執俱在。他土菩薩。二習未侵。至若此間聲聞。我執雖空。而法愛猶存。聞此盡執之法。故應歡喜。不言地涌及文殊等者。或已隣極果。或道後行因。旣無所執。亦無所喜也。

二如來引本事而垂答四 一先舉本師二次明

本事三結會古今四別囑宿王 初

爾時佛告宿王華菩薩。乃往過去無量恒河沙劫。有佛號日月淨明德。如來應供。正徧知。明行足。善逝。世間解。無上士。調御丈夫。天人師。佛世尊。○其佛有八十億大菩薩摩訶薩。七十二恒河沙大聲聞衆。○佛壽四萬二千劫。菩薩壽命亦等。○彼國無有女人。地獄。餓鬼。畜生。阿修羅等。及以諸難。地平如掌。琉璃所成。寶樹莊嚴。寶帳覆上。垂寶華幡。寶瓶香爐。周徧國界。七寶爲臺。一樹一臺。其樹去臺。盡一箭道。此諸寶

樹皆有菩薩聲聞而坐其下。諸寶臺上各有百億諸天。作天技樂歌歎於佛。以爲供養。

初時劫名號曰能照晝。喻俗智涉事。月能照夜。喻真智契理。月乃淨中具明。喻真不礙俗。日乃明中具淨。喻俗不礙真。真俗既已無礙。理事由來圓融。佛德如是。取喻爲名也。不言國名者。愚謂卽是娑婆。但彼時尚屬善世。或另有佳稱。恐不善會者。反令問答不能相應。故不言也。○其佛下兩乘弟子。不言辟支者。聲聞攝故。○佛壽下主伴壽量。菩薩壽命等佛者。乘願助化。生滅與俱故。○彼國下依

正淨善。無有女人。則生於其國者。皆修梵行。無有惡道。則生於其國者。俱稱善友。無有諸難。則生於其國者。常得見佛。如掌琉璃。行列寶樹爲嚴。非若今之坑坎堆阜。瓦礫荆棘。漫空寶帳。懸垂華幡。爲彩。非若今之烈日流金。暴風折木。瓶華爐香。處處嚴潔。非若今之雜穢滿目。樹論臺歌。在在佛法。非若今之是非盈耳。蓋以境隨心轉。心淨則佛土淨也。文中言一箭道者。補註云。二里。大成云。取射垛爲則。或一百二十步。一百三十步。一百五十步也。二次明本事三。一現神供佛。二然身供佛。三燒

臂供塔 初二 一聞法獲益二感恩供養 初

爾時彼佛爲一切衆生喜見菩薩及衆菩薩諸聲聞衆說法華經。○是一切衆生喜見菩薩樂習苦行。於日月淨明德佛法中精進經行。一心求佛。滿萬二千歲已。得現一切色身三昧。

初佛爲說法。苦行在躬。道德感孚。一切衆生見者歡喜。因命是名。以是彼時當機。故置爲言。餘諸菩薩聲聞。或屬發起。或屬影響。或屬結緣。非是正爲。故云及也。○是一下修習獲益。爲法度生。不避艱辛。故云樂習苦行。離卧遣睡。磨煉身心。故云精進。

經行。不爲人天福報。小果權乘。故云一心求佛。時經萬二千歲者。顯操行之久也。得現色身三昧者。大成云。此三昧有三義。一者內現。如今經身根清淨。十方依正。於身中現。如明鏡現像。二者外現。如妙音觀音。隨機示現。十界色身。如寶月印水。三者內外現。如大集經。已身佛身衆生身。彼此互相顯現。如三珠對影。愚謂正由內現。故能隨影外現。由隨影外現。故能自他容卽。復由自他容卽。故常內現。常外現。互爲緣起。而總成一普現色身三昧。

二感恩供養

得此三昧已。心大歡喜。卽作念言。我得現一切色身三昧。皆是得聞法華經力。我今當供養日月淨明德佛。及法華經。○卽時入是三昧。於虛空中。雨曼陀羅華。摩訶曼陀羅華。細末堅黑栴檀。滿虛空中。如雲而下。又雨海此岸栴檀之香。此香六銖。價直娑婆世界。以供養佛。

初念恩。擬供。歸功此經者。依於此經。分得事事無礙力故。供佛及法者。法是佛說。知法恩。同佛恩故。○卽時下。入定供養。無盡身雲。徧於虛空。雨華雨香。皆以三昧之力。故須入也。言堅黑者。以栴檀類。

多。惟此爲佳。故海此岸者。準正法念經云。妙高山南海此岸。則此岸卽南岸也。二十四銖爲一兩。六銖者。一兩中四分之一耳。價直娑婆者。顯是香中絕品。以此供佛者。爲表恩大難酬。現神供佛竟。

二然身供佛三 一喜見然身二諸佛讚善三佛

默身盡 初

作是供養已。從三昧起。而自念言。我雖以神力供養於佛。不如以身供養。卽服諸香。栴檀薰陸。兜樓婆。畢力迦。沉水。膠香。又飲薝蔔諸華香油。滿千二百歲已。香油塗身。於日月淨明德佛前。以天寶衣。而自纏身。

灌諸香油。以神通力願而自然身。

資定供佛。供已不佳。故云從三昧起。自念神力供養。不如以身者。有二義。一者外財易捨。不如內財難捨。難捨能捨。方顯知恩故。二者神現似虛。不如色身實有。實有能捨。方顯執盡故。卽服諸香者。欲變腥臭氣也。薰陸出大乘國。西域記云。葉似棠梨。然亦不出華梵。若依字釋義。應是陸地所產。還薰於陸者。毘樓婆。此云香草。出鬼神國。畢力迦。此云丁香。膠香者。樹所出膠。如松香之類。又飲香油者。兼爲燒然易也。千二百歲。顯內熏已久。內熏已久。

則外垢易淨。故惟以香油塗身。在於佛前者。爲供
佛故。衣纏油灌者。令如法故。乘神通力。而發供佛
之願。故云神通力願。願以神助。不須世火。故云而
自然身。夫身者。五蘊假合。衆緣幻成。內立妄宰。而
成我見之根。外執實有。而爲法礙之本。無始保守。
有生與俱。對境瞥起。空說無我之宗。遇緣便熾。誰
空有法之計。喜見如是。今古常輝。

二諸佛讚善

光明徧照八十億恒河沙世界。○其中諸佛。同時讚
言。善哉。善哉。善男子。是真精進。是真精進。是真法供養如來。

若以華香纓絡燒香末香塗香。天繒幡蓋及海此岸
栴檀之香。如是等種種諸物供養。所不能及。假使國
城妻子布施。亦所不及。善男子。是名第一之施。於諸
施中。最尊最上。以法供養諸如來故。

初光所照處。○其中下諸佛稱讚。以能盡二執。故
重讚善哉。是真精進者。身尚不惜故。是真法供者。
能契佛道故。昔智者誦經至此。親見靈山一會者。
良有以也。華香纓絡等。執愛尚輕。爲供猶易。故云
所不能及。國城妻子等。執愛雖重。然是身外之物。
較之內身。猶爲易捨。故云亦所不及。第一之施者。

超出上二故最尊最上者。成佛親因故。以法句轉
釋最尊最上之義。正以無始保愛。一旦頓捨。與法
相應。與道相契。故爲法供。故能超出衆施。而爲最
尊最上。三佛默身盡。

作是語已。而各默然。其身火然千二百歲。過是已後。
其身乃盡。

作是語已。而各默然者。執盡無可說故。其身火然
千二百歲者。乘願力故。過是已後。其身乃盡者。利
益成故。又上文服香飲油千二百歲。屬方便道。圓
伏二執。此云其身火然千二百歲。屬加行道。圓斷

二執。良以我法二執。久在六根。無始保愛。難以頓遣。故伏斷位中。各經千二百歲。若前云精進經行。滿萬二千歲者。猶是初心向道。凡位攝心。時出時入。若存若亡。故經時猶長。然以佛法增上力。故亦能獲得現身三昧。所謂小聖不及大凡是也。今云過是已後。屬解脫道。解脫道中。執除空現。故云其身乃盡。然身供佛竟。

三燒臂供塔五 一喜見轉生二白父詣佛三蒙佛囑累四戀慕起塔五燒臂作供 初

一切衆生喜見菩薩作如是法供養已。命終之後復

生日月淨明德佛國中。於淨德王家結跏趺坐。忽然化生。

復生淨明國中者。緣未盡願未了故。王名淨德者。居塵不染。卽俗證真之稱。爲求童真入道。故生其家。忽然者。三昧功成。生死去來如夜旦故。彼國無有女人。故云化生。

二白父詣佛二 一白父當供二升空往詣 初卽爲其父而說偈言。大王今當知。我經行彼處。卽時得一切。現諸身三昧。勤行大精進。捨所愛之身。○說是偈已。而白父言。日月淨明德佛。今故現在。我先供

養佛已得解一切衆生語言陀羅尼。復聞是法華經八百千萬億那由他。甄迦羅頻婆羅阿閼婆等偈大王。我今當還供養此佛。

初白父述事。初生便能說偈者。不由胞胎。無隔陰之昏。及孩提之限也。經行彼處。指前世在彼佛所。精進經行。卽得三昧。指前世一心求佛。所獲利益。精進捨身。指前世爲報佛恩。然身作供。此自述生前事也。流行本。此下更有供養求慧二句。乃後人妄加。不錄。○說是下。顯益言供。而白父言。乃至今故現在者。自慶異世猶能值佛。我先供養。乃至復

聞法華者。自慶身後猶能獲益。此歷明當供意也。
解語陀羅尼。亦有三義。一謂聞而能解。如本經耳
根功德文云。三千大千界。內外諸音聲。乃至其耳
聰利故。悉能分別知。二謂解而能說。如寶積經云。
有三昧。名解一切衆生語言。得此三昧者。善能宣
說一切語言等。三謂圓解無礙。如本經意根功德
文云。聞一偈一句。通達無量無邊之義。解是義已。
能演說一句一偈。至於一月四月。乃至一歲等。然
此三義。亦互爲緣起。謂正由一切能聞。故一切能
說。由一切能說。故一中解異。復由一中解異。故常

能聞常能說。由是統收此三。而總爲一大陀羅尼。
復聞法華者。身盡執除。感佛爲說故。又陀羅尼力。
處處成聞故。甄迦羅。亦云矜羯羅。乃五十大數中。
第十六數。頻婆羅。亦云頻跋羅。乃第十八數。阿閼
婆。亦云阿芻婆。乃第二十數。要知此等數目。超出
凡夫心量。不必妄解。又上云供養佛已。應指然身
之後。當此之時。身盡執除。且道孰爲能得。孰爲所
得。孰爲能聞。孰爲所聞。正以無有能得所得。如是
而得語言陀羅尼。無有能聞所聞。如是而聞妙法
蓮華經也。二升空往詣。

白已卽坐七寶之臺。上升虛空。高七多羅樹。往到佛所。頭面禮足。合十指爪。以偈讚佛。容顏甚奇妙。光明照十方。我適曾供養。今復還親覲。○爾時一切衆生喜見菩薩。說是偈已。而白佛言。世尊。世尊。猶故在世。初詣佛讚慶。坐臺升空者。乘神往也。禮足偈讚者。慶見奇也。相好莊嚴。殊勝無比。故云容顏甚奇妙。燄網交輝。圓映無際。故云光明照十方。如斯容光經劫難逢。而喜見適曾供養。今復親覲。故說偈讚佛以自慶也。○爾時下白佛鳴志。重稱世尊者。表親愛之意。如子見母。連呼其母之類。猶故在世者。

法華指掌疏
三
鳴慶幸之志。意謂弟子已經再生。將謂不得見佛。孰虞世尊猶故在世。望外之慶。雖失乳之兒。再遇慈母。亦未足爲喻也。白父詣佛竟。

三蒙佛囑累

爾時日月淨明德佛告一切衆生喜見菩薩善男子。我涅槃時到滅盡時至。汝可安施床座。我於今夜當般涅槃。○又勅一切衆生喜見菩薩善男子。我以佛法囑累於汝。及諸菩薩大弟子并阿耨多羅三藐三菩提法。亦以三千大千七寶世界諸寶樹寶臺及給侍諸天悉付於汝。我滅度後所有舍利亦付囑汝。當

令流布。廣設供養。應起若干千塔。○如是日月淨明
德佛。勅一切衆生。喜見菩薩已。於夜後分。入於涅槃。
初唱言當滅。喜見旣來。補處得人。故云涅槃時到。
囑以大事。無復餘緣。故云滅盡時至。教以安施床
座者。速辦滅儀。示以今夜當滅者。無容少緩。○又
勅下。正以付囑。囑以佛法者。教令傳宣。囑以菩薩
等。教令成就。付以阿耨菩提者。教令補處佛位。付
以三千世界者。教令於此成佛。旣於此成佛。則寶
樹寶臺。皆爲果中受用。給侍諸天。皆爲果中役使。
故云悉付於汝。付以舍利者。爲滅後不盡之益。教

法華持掌疏
三
以起塔者。作人天種福之田。○如是下。囑已入滅。諸佛涅槃。多在中夜。表無爲正位。今在後分者。表大悲願重。佛法久住。雖至最後後際。猶能於無明長夜。爲衆生作照世燈也。

四戀慕起塔

爾時一切衆生喜見菩薩見佛滅度。悲感懊惱。戀慕於佛。卽以海此岸栴檀爲積。供養佛身。而以燒之火滅已後。收取舍利。作八萬四千寶瓶。以起八萬四千塔。高三世界。表刹莊嚴。垂諸幡蓋。懸衆寶鈴。

佛滅則四衆無依。故悲感懊惱。一見而不復再見。

故戀慕於佛。要知戀慕於佛者。爲法眷注。悲感懊惱者。爲衆哀傷。豈同世人。因愛見而生悲戀者乎。積者積聚義。謂積聚栴檀闍衛如來也。而以燒之者。大成云。佛說火化之法。在已則顯三昧之力。播熏煉之功。故化火自焚。舍利迸透。在人則掩臭腐之穢。免螻蟻之食。故其魄不滯。其神清升。而此方卧淤膿於荒郊。埋腐骸於朽壤。習以爲是。反以火化爲不忍。方其穴地負土。全體而坑之。爲可忍耶。二者皆出於不得已耳。達人觀之。一等歸盡。沉之可也。露之可也。棄之溝中。內之石槨。無不可也。收

取舍利。作寶瓶以貯之。起寶塔以供之。八萬四千。
表法門對惑之數。高三世界。取十方瞻仰之儀。大
成云。三世界。謂三千世界也。準教中云。四大洲日
月。須彌盧欲天。初禪各一千。名爲小千界。上覆一
二禪。小千復一千。名爲中千界。上覆一三禪。中千
復一千。名爲大千界。上覆一四禪。今言高三世界。
則是至四禪天也。表刹垂旛。有眼者。感至人之已
往。懸衆寶鈴。有耳者。思法音之再震。臨終之囑。蓋
爲此也。五燒臂作供五。一祈衆憶念二燒臂
成益三時衆憂惱四立誓還復五天地呈祥。初

爾時一切衆生喜見菩薩復自念言。我雖作是供養。心猶未足。我今當更供養舍利。便語諸菩薩大弟子。及天龍夜叉等。一切大衆。汝等當一心念。我今供養日月淨明德佛舍利。

自念作是供養。心猶未足者有二義。一者貯瓶起塔。但能令人天種福。不能令時衆發菩提心。二者財施易捨。但能了本師遺命。不能盡自己二執之習。爲盡餘習。復欲令他發心。故轉念當更供養。語諸菩薩等。教以當一心念者。祈衆運心憶念。代爲致祝。令其事得成也。

法華指掌疏
二燒臂成益

作是語已。卽於八萬四千塔前。然百福莊嚴臂。七萬二千歲。而以供養。令無數求聲聞衆。無量阿僧祇人。發阿耨多羅三藐三菩提心。皆使得住現一切色身三昧。

塔滿八萬四千。應非一處。而曰於前者。一塔一身。蓋以普現色身三昧力也。百福莊嚴之臂。不易可得。且臂之於我。爲用最親。稍有所傷。便動執習。故獨燒之時。經七萬二千歲者。亦有二義。一願力久供故。二執習難盡故。又七萬二千歲者。爲盡前七

識所具習氣更侵八識中一二分故尚留餘習。至最後身成佛時斷也。令發菩提心者。感其難捨能捨欲效之耳。皆使住三昧者。菩提心增上力故。

三時衆憂惱

爾時諸菩薩。天人阿修羅等。見其無臂。憂惱悲哀。而作是言。此一切衆生喜見菩薩。是我等師。教化我者。而今燒臂。身不具足。

菩薩賴以成就。天人等賴以化導。故見其無臂。憂惱悲哀。意以爲失所依也。是我等師。無臂何以師我。教化我者。無臂何以教我。如來臨終之囑。付之

東流我等當來所歸。幾同西日。言念及此。自不禁
憂惱而悲哀也。

四立誓還復

於時一切衆生喜見菩薩於大衆中。立此誓言。我捨
兩臂。必當得佛金色之身。若實不虛。令我兩臂還復
如故。作是誓已。自然還復。由斯菩薩福德智慧淳厚
所致。

見其悲哀過分。恐失利益。故於衆中立誓。以安其
心也。我捨兩臂。必當得佛金色之身者。顯今雖無
臂。當來成佛。猶能爲衆作依止也。恐其不信。故誓

以若實不虛令我兩臂還復如故。誓已還復者。驗知成佛不虛。不惟顯當來之有依。亦不失現前之師教也。由斯句出還復之由。財施供佛。能感成佛之福。法施供佛。兼致成佛之慧。既淳且厚。不久成佛。故致所言必應。

五天地呈祥

當爾之時。三千大千世界。六種震動。天雨寶華。一切人天。得未曾有。

三千世界。表現行種子習氣。二執各三。故成六種。今已俱破。故以震動表之。天雨寶華。表智慧開敷。

觀斯瑞應。際斯奇緣。故云得未曾有。次明本事竟。
三結會古今

佛告宿王華菩薩。於汝意云何。一切衆生喜見菩薩。
豈異人乎。今藥王菩薩是也。其所捨身布施。如是無
量百千萬億那由他數。

昔之喜見。卽今之藥王。欲知遊化之方。應觀喜見
之事也。其所捨身等。乃結答苦行之問。言藥王捨
身布施。如是相類苦行。尚有無量等數。若上之所
說。不過於多分事中。略舉其一耳。

四別囑宿王

隨品囑累。不同前品。言該多衆。故云別囑。

三

一顯法供

殊勝二明持人功德三囑應當弘護 初

宿王華若有發心欲得阿耨多羅三藐三菩提者能然手指乃至足一指供養佛塔勝以國城妻子及三千大千國土山林河池諸珍寶物而供養者

欲得菩提盡執爲本身分執重餘皆執輕故然指之供勝似餘者所以梵網經云若不燒身臂指供養諸佛非出家菩薩楞嚴亦云我滅度後其有比丘身然一燈燒一指節及於身上爇一香炷我說是人無始宿債一時耐畢然雖如是也須發殷重心起二空觀仰祈諸佛爲作證明自念我今身分

尚捨。何況餘物。自此於一切時中。一切法上。念念與初心相應。直至成佛。永無顧戀。如是雖不及於然身燒臂。而究其與道相應。其功無二。若乃識念未忘。諸蘊違礙。我執正熾。法見未融。徒受無益之苦。反招外行之譏。空慕其迹。亦何益哉。文中云。能然手指者。或一節。或兩節。足一指。則三節俱然也。不云然身。及然臂者。恐未到喜見境界。不能來去自由。應誓還復。空壞道器。反誤前程。正如畫鵠不成。反類於烏。故且令然指以護其機。

二明持人功德二 一約全經明德二約本品明

德 初三 一受持功德二書寫功德三供養功

德 初二 一較能持之福二喻所持之法 初

將欲囑累較量
持福以發勝心。

若復有人以七寶滿三千大千世界供養於佛及大
菩薩辟支佛阿羅漢是人所得功德不如受持此法
華經乃至一四句偈其福最多。

滿界七寶供養四聖不及持經四句者以佛聖無
我不以供我爲重惟以弘法爲重故又七寶供養
是福德因受持此經是慧德因二德較量慧爲勝
故又七寶供養爲佛遠因受持此經菩提在近故。

乃至一四句偈。其福最多者。言少持之福。尚多於彼。况復多持。不言可知也。

二喻所持之法四 一喻深大高上二喻照明破

暗三喻尊特殊勝四喻拔苦與樂 初

宿王華。譬如一切川流江河。諸水之中。海爲第一。此法華經。亦復如是。於諸如來所說經中。最爲深大。○又如土山。黑山。小鐵圍山。大鐵圍山。及十寶山。衆山之中。須彌山爲第一。此法華經。亦復如是。於諸經中。最爲其上。

初喻教深大。川流江河。喻諸教各偏。海爲第一。喻

法華純圓。純則諸教莫探。故名爲深。圓則統攝諸教。故名爲大。若別喻者。川源淺近。臨之少得其利。喻小教偏空。依之僅證小果。流水長逝。導之可通江河。喻大乘始教。進之可入終實。江流無住。任來往而不留。喻終教融通。照空有而無礙。河性自淡。不存鹽鹵之跡。喻頓教離言。迥超名相之稱。至若海水洪深。納百川而同味。淵源浩大。容萬派以朝宗。喻法華甚深。攝四教而同圓。妙理廣大。會三乘而歸一。法喻合明。勝劣自見。○又如下。喻乘高上。土山能生萬物。喻人乘能生萬善。以萬善皆依人。

中修故。黑山者。俱舍云。南洲從中向北。有三重黑山。山而曰黑者。無有光明。喻天乘耽樂。不生智慧光故。小鐵圍圍小千界。喻聲聞乘以聲聞執著偏空。如鐵圍難透故。大鐵圍圍大千界。喻辟支乘以辟支更侵二習。遠越聲聞乘故。十寶山者。華嚴云。雪山。香山。軻利羅山。仙聖山。由乾陀山。馬耳山。尼民陀山。斫迦羅山。宿慧山。須彌山。今言雖標十。意惟取九。以喻菩薩之乘。以須彌留爲佛乘。喻故。九山喻菩薩者。以菩薩實德內充。智光外映。如寶山也。須彌橫海。落羣峯之高。故爲第一。喻法華稱性。

障餘乘之耀。故爲最上。

二喻照明破暗

又如衆星之中。月天子最爲第一。此法華經亦復如是。於千萬億種諸經法中。最爲照明。○又如日天子能除諸闇。此經亦復如是。能破一切不善之闇。

初喻法照明。普天星宿。各具燭夜之光。然各有分野。一輪皓月。獨朗輝空之耀。故最爲第一。合中千萬億種經法。隨分顯理。各被一類之機。如星光分照。此經最爲照明。圓彰佛性。同記菩提之果。如皓月獨明。法喻歷然可對。○又如下喻智破暗。日出

則雲開霧散。諸闇皆除。智明則我墮法壤。不善全破。以此經全彰佛慧故也。

三喻尊特殊勝二 一喻經尊特二喻經殊勝

初

又如諸小王中。轉輪聖王最爲第一。此經亦復如是。於衆經中最爲其尊。○又如帝釋於三十三天中王。此經亦復如是。諸經中王。○又如大梵天王。一切衆生之父。此經亦復如是。一切賢聖學無學及發菩薩心者之父。

初喻威德尊特。小王各據一國。掃一國之烟塵。輪

王統攝四洲。清四洲之惡逆。故最爲第一。衆經隨分破惑。若彼小王。此經圓破五住。輪王堪比。故最爲其尊。○又如下。喻自在尊特。帝釋統餘天爲臣佐。獨能自在。故得王稱。此經攝諸經爲眷屬。特顯圓融。故置王號。○又如下。喻覆護尊特。大梵覆護衆生。衆生咸爲其子。此經覆護三乘。三乘皆稱爲父。曰父。曰王。曰尊。總一尊特義也。

二喻經殊勝

又如一切凡夫人中。須陀洹。斯陀含。阿那含。阿羅漢。辟支佛爲第一。此經亦復如是。一切如來所說。若菩

薩所說。若聲聞所說。諸經法中。最爲第一。有能受持。是經典者。亦復如是。於一切衆生中。亦爲第一。○一切聲聞辟支佛中。菩薩爲第一。此經亦復如是。於一切諸經法中。最爲第一。如佛爲諸法王。此經亦復如是。諸經中王。

初喻法勝人勝。羅漢之下。應有中字。不然則法喻難齊。蓋以凡夫人中。四果人中。獨推支佛第一。合中。如來所說。兩乘所說。惟顯斯經爲最。經旣如是。持人亦然。故卽就喻合之。一切衆生。合凡夫四果。持人第一。合支佛獨勝。此雙顯法勝與人勝也。○

一切下。喻因勝果勝。焦芽敗種。豈能與長林並茂。
故菩薩第一。秋水行潦。難以配大海同觀。故此經
爲最。以此經因是佛因。故以菩薩爲喻。此單顯因
勝也。佛爲法王。超諸聖而獨尊。此爲經王。邁餘乘
而獨步。以此經果是佛果。故以法王爲喻。此單顯
果勝也。喻尊特殊勝竟。

四喻拔苦與樂

宿王華。此經能救一切衆生者。此經能令一切衆生
離諸苦惱。此經能大饒益一切衆生。充滿其願。○如
清涼池。能滿一切諸渴乏者。如寒者得火。如裸者得

法華指掌疏
三
衣。如商人得主。如子得母。如渡得船。如病得醫。如闇得燈。如貧得寶。如民得王。如賈客得海。如炬除闇。○此法華經亦復如是。能令衆生離一切苦。一切病痛。能解一切生死之縛。

初雙標二用。此經在處。諸佛護念。故能救諸衆生。依教修習。三障俱轉。故能離諸苦惱。謂轉報障。離現在苦惱。轉惑業二障。離當來苦惱。此拔苦用也。能大饒益等。現前有求皆遂。當來無願不果。如藥草喻云。是諸衆生聞是法已。現世安隱。後生善處。以道受樂等。此與樂用也。○如清下。取喻顯義。喻

有十二。第一喻顯與樂之用。清而且涼。飲之則神清氣爽。渴而且乏。得之乃心樂身安。然三乘五性。總爲渴乏之者。隨分受益。何異清涼之池。故爲喻也。次二喻顯拔苦之用。冷來逼身曰寒。得火則煖。喻衆生衆惱交煎。遇法則脫也。衣不障體曰裸。得衣則嚴。喻衆生一善不修。遇法則具也。其餘九喻。皆雙含二用。將本圖利曰商。得主獲續本之樂。免失利之苦。喻菩薩以道化生。遇法得道。免絕化之憂也。賴乳養身曰子。得母獲續乳之樂。免喪身之苦。喻菩薩依理自修。遇法悟理。免滯行之怖也。自

濟濟人曰渡。得船獲到岸之樂。免俱溺之苦。喻菩薩自利利他。遇法同修。免俱墜之患也。有疾纏身曰病。得醫則病瘥身安。喻凡夫有惑障性。遇法則惑盡性顯。無光照室曰暗。得燈則暗滅室明。喻外道無智明心。遇法則邪退心開。無財充用曰貧。得寶則離貧財充。喻二乘闕行。無真功德。遇法則諸行備具。衆德圓滿。依國而住曰民。得王則外患不生。內救有依。喻衆生依於三界。遇法則魔外不侵。度脫有歸。入海採寶曰賈客。得海無滯。此之苦有得寶之樂。喻衆生發菩提心而求佛果。遇法無退。

轉之憂。有成佛之望。不辨東西曰闇。得炬則闇盡。路明。喻衆生發心修行。不辨邪正。依於此經。愚闇滅。而正智顯。邪正分。而覺路達矣。○此法下。以法結合。現境違心曰苦。四大不調曰病。能令離此者。轉報障。離現在苦也。見思二惑。爲分段生死之縛。塵沙無明。爲變易生死之縛。能解此者。轉惑業二障。離當來苦也。不言得樂者。離苦自然得樂。不須說故。受持功德竟。

二書寫功德

若人得聞此法華經。若自書。若使人書。所得功德。以

佛智慧籌量多少。不得其邊。

準分別功德品云。若我滅後。聞是經典。有能受持。若自書。若教人書。則爲起立僧坊。以赤梅檀。作諸殿堂等。若以事論。則起立僧坊。作諸殿堂等。功德似有分限。故此重明。意顯前之所說。乃借事表法。故愚於前疏。以法報爲僧坊。以化身爲殿堂者。若預契此意。佛智籌量。尚不得其邊。況復餘人。是謂真無邊也。三供養功德。

若書是經卷。華香。纓絡。燒香。末香。塗香。幡蓋。衣服。種種之燈。蘇燈。油燈。諸香油燈。薝蔔油燈。須曼那油燈。

波羅羅油燈婆利師迦油燈那婆摩利油燈供養所得功德亦復無量。

蒼菊黃華。須曼那。善攝意華。波羅羅熏華。婆利師迦。夏生華。亦云雨華。雨後生故。那婆雜華。摩利鬘華。皆稱油燈者。以此衆華熏油然燈。前文所謂熏油常然之是也。準分別功德品偈已云。若有信解心。受持讀誦書。若復教人書。及供養經卷。散華香末香。乃至如是供養者。得無量功德等。今復重明者。以前文乃是况顯兼度功德。兼帶而言。非正論其德也。約全經明德竟。

二約本品明德四 一聽聞功德二受持功德三

修行功德四讚善功德 初

宿王華。若有人聞是藥王菩薩本事品者。亦得無量無邊功德。

二執旣盡。可敵全經之功。故持品亦同持經。得無量無邊功德。設有根鈍智劣。或障重緣淺。不能通利全經。卽當著力此品。勿謂不完。有失大利。文中言聞義亦兼持。不得以辭害義也。

二受持功德

若有女人。聞是藥王菩薩本事品。能受持者。盡是女

身後不復受。

男女雖別。佛性無二。但以執重慧淺。受此五障之身。果能聞而受持。與心相應。自然盡是女身。後不復受。設有身墮女流。百惡逼惱。極生厭離。願轉男身者。惟當加意此品。

三修行功德四 一轉生極樂二離惱得忍三見佛遙讚四指益結告

初轉生極樂

若如來滅後。後五百歲中。若有女人。聞是經典。如說修行。於此命終。卽往安樂世界。阿彌陀佛。大菩薩衆。

圍繞住處。生蓮華中寶座之上。

準大集經。如來滅後有五五百歲。第一五百歲。解脫堅固。第二禪定堅固。第三多聞堅固。第四塔寺堅固。第五鬪諍堅固。今云後五百歲。卽鬪諍堅固時也。當此之時。人尚鬪諍而執習堅固。法當壞滅。而怨嫉繁興。況在女流。猶能起真精進。作法供養。豈不捨穢軀而受清虛之身。離苦趣而生安樂之國。設有願見彌陀。求生安養。念力多乖。淨業難成者。胡爲不捨其身命。力行此品。文中言如說修行者。或真能盡執。亦不必定捨身命。或實捨身命。願

以撇無始執習。二俱是也。卽往安樂者。言正當修行之時。設有願生彼國。隨念卽至。故阿彌陀佛大菩薩衆。圍繞住處者。言旣生於彼。卽到佛及菩薩住處。不同念佛功劣。猶墮疑城也。生蓮華中。寶座之上者。華開臺現。坐於其上。不同下品下生。經久乃開也。二離惱得忍。

不復爲貪欲所惱。亦復不爲瞋恚愚癡所惱。亦復不爲憍慢嫉妬諸垢所惱。得菩薩神通無生法忍。

極樂世界。衣食自然。故不爲貪欲所惱。處處法音。起慈生慧。故不爲瞋恚愚癡所惱。上善聚會。揖讓

愛敬。故不爲憍慢嫉妬。乃至一切諸垢所惱。言惱者。惑習數動。惱亂自心。欲潔偏染。無能自抑。一生極樂。都無是事。設於娑婆修行。惑習未盡者。勿忘回向淨土。有類水牯牛過窻櫺也。菩薩神通者。如清旦供養。食時還歸之類。無生法忍者。智契無生。忍可決定。永無退轉也。然此通此忍。性本自具。但以惑習所障。未卽發悟。今以諸垢不惱。故能得也。

三見佛遙讚

得是忍已。眼根清淨。以是清淨眼根。見七百萬二千億那由他恒河沙等諸佛如來。○是時諸佛。遙共讚

言。善哉善哉。善男子。汝能於釋迦牟尼佛法中受持
讀誦思惟是經。爲他人說。所得福德無量無邊。○火
不能焚。水不能漂。汝之功德。千佛共說。不能令盡。汝
今已能破諸魔賊。壞生死軍。諸餘怨敵。皆悉摧滅。善
男子。百千諸佛。以神通力。共守護汝。於一切世間天
人之中。無如汝者。惟除如來。其諸聲聞。辟支佛。乃至
菩薩。智慧禪定。無有與汝等者。

初根淨見佛。證無生忍。離生滅見。故得眼根清淨。
眼清淨故。一切無能障礙。故能見衆多佛。數限七
百萬二千億那由恒沙者。以未到佛地。見有分齊。

故。○是時下。佛讚功德。復有二義。初總讚福德。後五百歲。猶能聞是經典。身在女流。猶能如說修行。故重言善哉。以讚美之。如法盡執。是真受讀思惟。見者感發。是真爲他人說。故諸佛咸讚其能。若今之喃喃故紙。惶惶高座者。豈足以語此哉。此福是成佛之福。此德是成佛之德。故應甚深無量廣大無邊。○火不下。別顯深廣。所證與實相相應。故火不能焚。水不能漂。所獲與諸佛齊等。故千佛共說。不能令盡。身爲五陰魔。執爲煩惱魔。二俱有害法身。故亦名賊。此人旣如說修行。身執俱盡。故云破。

也。生來死去。互相攻擊。擾我心王。名之爲軍。此人
既生方得忍。永無退轉。故云壞也。或習數動。侵我
智境。名爲怨敵。此人既諸垢莫惱。餘習不生。故云
摧也。此上顯功德廣大。續佛慧命。端賴此人。故蒙
百千諸佛。神力守護。行於世間。無能爲障。化導天
人。爲天人師。故於若天若人。無能如者。執習不動
空性圓明。定慧等佛。故云惟除如來。二乘定慧偏
枯。菩薩未極圓融。故云無與等者。此上顯功德甚
深。四指益結告。

宿王華。此菩薩成就如是功德智慧之力。

一切功德。皆以智慧攝持。故言功德及智慧之力。然此人本娑婆女流。繼而爲安養男子。今如來又以菩薩稱之。且讚其功德智慧成就。將不久易以如來之號。功超三祇。力敵百劫。如說修行之功。其偉矣哉。修行功德竟。

四讚善功德

若有人聞是藥王菩薩本事品。能隨喜讚善者。是人現世口中常出青蓮華香。身毛孔中常出牛頭栴檀之香。所得功德如上所說。

末世衆生。二執堅固。拔一毛而利天下。尚不肯爲。

況能然身供佛燒臂供塔耶。故凡聞此事者。鮮有不心生怨嫉。而交口誹謗者也。由此所以聖道難行。真修叵得。若果能隨順歡喜。極言讚善。則所在轉娑婆之穢。一言化安養之境。何異口吐蓮香。身放牛頭。如上所說。指在隨喜功德品中。蓋以一品之功。可敵全經之功。故隨喜讚善。其德亦同也。明持人功德竟。

三囑應當弘護二 一囑弘本品二囑護全經

初

是故宿王華。以此藥王菩薩本事品。囑累於汝。我滅

法華持掌疏 卷一
度後。後五百歲中。廣宣流布於閻浮提。無令斷絕。惡魔魔民。諸天龍夜叉鳩槃荼等。得其便也。

承上聞聽受持。修行讚善。有如是德。是故囑以後五百歲。廣宣流布。三千世界。偏說閻浮者。有二義。一閻浮執重。宜以此治故。二藥王宿緣。偏重在此故。惡魔魔民。謂魔王及魔所屬也。天謂魔天。龍謂毒龍。夜叉鳩槃荼爲惡鬼。是等皆樂著生死。誤陷衆生。爲其勞侶。廣其族黨。若此經斷絕。則彼得其便。故以無令囑之。

宿王華。汝當以神通之力。守護是經。所以者何。此經則爲閻浮提人。病之良藥。若人有病。得聞是經。病卽消滅。不老不死。○宿王華。汝若見有受持是經者。應以青蓮華盛滿末香。供散其上。散已。作是念言。此人不久。必當取草。坐於道場。破諸魔軍。當吹法螺。擊大法鼓。度脫一切衆生。老病死海。是故求佛道者。見有受持是經典人。應當如是生恭敬心。

初正囑護經。末法之際。波旬桓赫。欲護是經。非神力不可。故囑以神力守護。所以下徵釋應護之義。亦爲斷宿王問所不及之疑也。言宿王因藥王而

請問者。將謂藥王。別有應症之藥。壽世之術。而欲效之。豈知夫法華一經。卽是良藥。卽能應症。卽能壽世。故取此以釋應護之義也。病卽消滅。不老不死者。有二義。一者煩惱縈心。是名爲病。無常迫身。是名老死。得聞是經。斷煩惱而證真常。是爲病卽消滅。不老不死也。二者因聞是經。我法執盡。不見病性。亦無受者。故云病卽消滅。病尚不有。老死誰名。故云不老不死。○宿王下。兼囑供人。青蓮盛香。取其潔也。作念不久等者。生心如佛想故。取草者。準釋迦將成道時。有吉祥長者。施軟草爲座。佛取

而坐之。遂成正覺。此亦諸佛通軌。故云爾也。破魔軍。謂降魔成道也。吹法螺。謂道後說法。號令人天也。擊法鼓。謂策勵羣機。與諸魔戰也。度脫老病死海者。教化衆生。滅三毒。出三界。破魔網也。是故求佛等。以當機。勉餘衆也。如來意謂。汝見受持之人。旣應如是。是故一切求佛道人。凡有見者。皆應如是。生恭敬心。如來引本事而垂答竟。

三多寶以有益而讚問

說是藥王菩薩本事品時。八萬四千菩薩得解一切衆生語言陀羅尼。○多寶如來於寶塔中。讚宿王華

菩薩言。善哉善哉。宿王華。汝成就不可思議功德。乃能問釋迦牟尼佛如此之事。利益無量一切衆生。

初因問成益。設無問者。佛亦不說。故知因說成益。卽是因問成益也。解語陀羅尼者。若惟聞而能解。則是耳根與意根互用。若兼解而能說。則是意根與舌根互用。若更能圓解無礙。則是意根極圓。攝耳舌而同已。是亦由於聞法執盡。空性圓明。諸根互攝。自覺聞佛所說。一句中能解無量之義。若欲爲他人說。一句中亦能演無量之法。由此說名得解語陀羅尼也。○多寶下。多寶讚善。旣已總問遊。

化。又能別問苦行。故重言善哉。以讚美之。自得現
身三昧。解語總持。復欲饒益同行。因發是問。故讚
其成就。不思議德。乃能問也。由此一問。不惟現在
成益。且將展轉流通。以至後五百歲。故讚其利益
無量。一切衆生也。藥王盡執爲法竟。

法華指掌疏卷第六

終

音釋

汞

胡貢切音
哄水銀也

瘍

移章切音陽創癰
也又身傷曰瘍

顴

達員切音喃
權輔骨也

那含切音
南語聲也

普賢庵比丘尼興寶


興果

領合庵大衆共捐銀五十兩

延壽庵比丘尼淙信捐銀四兩

敬刊法華指掌疏一卷印造流通願生生世世在
在處處見

佛聞法親蒙授記



弗

